

Ekigumire Munonga Kushoboorora

Chicago, Illinois, USA

Okwamunaana 1, 1963

1 Yebare, ow'eishe-emwe. Yebare. Ka twinikye emitwe yaitu hati tushabe. Kandi twinikire emitwe yaitu, niinyebuuza ni bangahi abarikwenda ngu baijukwe omu kushaba, ka kimanywe noimutsya omukono gwawe.

2 Tataitwe ow'omu Iguru, nitwija Ahariiwe n'obucureezi, Mukama, nitwatura ngu titushemereire kwija. Kwonka ahabw'okuba Yesu akatuteeraho omuhanda kandi yaashashura omuhendo, n'ahabw'ekyo, nitubaasa kwija n'obumanzi aha Kitebe ky'embabazi, ahu turaagirire ekyetengo hoona. Mbwenu hati, Mukama, nk'oku turi hanu kureeta Obutumwa, obutungi bwa Kristo oburikwetegyerezibwa, Nitukwetenga, Mukama.

Kandi nihabaasa kuba hariho omuntu oshutami hanu, Taata, Ou orikugyezaho kwegyesa omu buryo bukur, kugira ngu Ogire ei waamwohereza, aha murimo mukuru Ogu waamaririire. Ninshaba, Taata, ngu ekyo ku kiraabe kiri kittyo, ekiro eki, ngu, ekigyendererwa Kyawe kihikiirizibwe. Kandi otuhwere obwo turiyo nitwija omumaisho Gaawe ahabw'okuheereza.

Hati, Waareeba egoy mikono yoona, kandi na hati nookireeba egoy eri ahaiguru. Noomanya ebi tukyenire. Mbwenu ninshaba ngu Obituhe, Taata. Nimpayo okushaba kwangye hamwe n'okushaba kwabo, n'ebyetengo byabo hamwe n'ebyetengo byangye, aha Itambiro ry'ezabu ahi ekitambo kyaitu kiri ekiro eki. Omu Iziina rya Mukama Yesu, nitushaba ngu Otubegyere Omugaati gw'Amagara, okuruga omu Kigambo Kyawe. Amiina.

Nimubaasa kushutama.

3 Munsasire ahabw'okukyerererwaho kakye, mbaire nimmanya ngu ekiro eki n'o-n'okukyerererwaho kakye, saaviisi ekyerereirweho kakye. Mbwenu nituza kufunza obwire, reero tuheze juba nk'oku turikubaasa. Hati nitwenda kuza omu Kigambo, ekiro eki, na byona ebiri omuriitwe.

Nimmanya ngu muri hanu, imwe, bamwe aha beeshongozi barungi aba abu na . . . Mel Johnson, nk'eky'okureeberaho, ou ndikumanya ngu ashutami hanu. Naamushaba ngu ayeshongore, atweshongorere, ekyo kyeshongoro eki ntarikubaasa kwiha omu biteekateeko byangye. Nimba ninkyeshongora obwire bwona mbumbire eminwa, nikigira ngu, "emiziga neeragara." Ekyo ni-ninkikunda. Kandi nintekateeka ngu naaza kutweshongorera ahari kyantsya y'aba Business Men, nari ahandi hantu.

4 Jim, niinyenda ngu Oteho omutima ekyo okinkwatire aha rutambi rw'amaraka. Kandi ku oraabe oine orutambi rw'amaraka rukye, okinteereho, eky'omutaano, ahabw'okuba abaana bangye nibenda kukihurira. Ku mba nk'owaayehwa amatsiko kakye, na-na-naakihurira, kituma naayehurira kurungi, kuhurira okweshongora kurungi. Kandi, Billy, ku ndikuza omu ofiisi eifo okwo, naaba ataireho ezo ntambi z'eb'yeshongoro obwire bwona, kandi nintekateeka ngu nikiba nk'ekyamuhwera.

Noomanya, omu kyeshongoro habamu ekintu, habamu amaani. Ekyo twena nitukimanya. Ekyo nitu-nitukyetyegyereza. Waareeba? Ekyo ni, reeba amahe, oku beeshongora ebyeshongoro kandi bakazina. Noomanya ngu okuza omu rugamba, omu ihe rya Ruhanga, eky'okubanza n'okweshongora? Abeeshongozi bakaba baza omumaisho g'eshanduukye y'endagaano, nibeesiima kandi nibeeshongora; bwanyima hakurataho eshanduukye y'endagaano; reero orugamba rukurataho. Ekyo kihikire. N'ahabw'ekyo, obwo nibwo buryo obuhikire.

5 Kandi egoy niyo nshonga eyaatuma twaija omu saaviisi nyekiro. Tukora ki? Tweshongora eby'eshongoro bya Mukama; bwanyima Eshanduukye y'endagaano, Ekigambo, tushoma Ekigambo; reero hakurataho orugamba, obwo turi-turi omunda. N'ahabw'ekyo ebendera mpango nizeehuuba, ekiro eki; Eiziina rya Yesu Kristo, Mukama Ruhanga asingizibwe, omuzigu atuntumurwe.

Kandi, Ai Ruhanga, singura ekiro eki, kandi ojune abantu, okize abarwaire n'abarikwitwa kubi; reetera abo, abaruhire n'abeinamiriire, okwimutsya emitwe yaabo kandi beesiime, Yetungire ekitiinisa kingi. Ahakuba eki twakishaba omu Iziina rya Mukama Yesu.

6 Niinyenda ngu ekiro eki, mubiikuure, naanye, ku muraabe mwine Baiburi zaanyu, kandi obumwe n'obumwe abantu bata akamanyiso aha mutwe mukye ogu ababuurizi bagambaho. Nkaba nyijuka ebi jubajuba, nangwa ntabihandiikire. Kwonka ku naaherize kurenzya emyaka makumi abiri na itaano, ahabw'enki, ameezi makye agahingwire, nimmanyisa omurundi gwa kabiri, n'ahabw'ekyo nikituma naagumirwa kakyeho kwijuka. Nyine enkojo nyangi kuruga omu ngamba. Kandi ku turikukura, nituba tutakiteekateeka nk'obunyakare, kandi nyine . . . Ku ndikuranzya Ekyahandiikirwe haza nkareeba, obwo nyijuka omutwe gw'okubuiriraho.

7 Ka tubiikuure omu kitabo kya Yoshua, eshuura ya 10, tutandikire aha mushororongo gwa 12.

Aha izooba eri MUKAMA yaahereireyo Abaamori omu mikono y'Abaisraeli, Yoshua akagambirira MUKAMA omu maisho gaabo, ati: Iwe izooba 'we, yemerera ahaiguru ya Gibeoni, na . . . Kwezi 'we, yemerera ahaiguru y'oruhanga rwa Ayalooni.

Eizooba ryayemerera, n'okwezi kwaguma aho, okuhitsya obu eryo ihanga ryaherize kuhorra abazigu baaryo. Timurikumanya ekyo ku kyahandiikirwe omu kitabo kya Yashari? Eizooba ryayemerera ahagati y'eiguru, tiryarahuka kurenga, ryamara omwanya nk'ogw'eizooba ryona.

Tihariho izooba erirabaire nk'eryo omu gaaribandiize n'agaakuratsireho, obu MUKAMA yaahurira eiraka ry'omuntu; ahakuba MUKAMA akarwanirira Abaisraeli.

8 Mukama ayongyere emigisha Ye aha Kigambo Kye ekyashomwa. Omwo niinyenda kwihamu omutwe gw'okubuuriraho nk'edakiika makumi ashatu, ku ndaabe nimbaasa kutarenzya ahari ezo (dakiika): Ekigumire Munonga Kushoboorora. Naaza kukozesa ekyo kigambo kimwe:[Paradox] Ekigumire Munonga Kushoboorora.

Hati okuruguirira ahari kashoboorozi ya Webster, ekigumire munonga kushoboorora "n'ekintu ekirikureebeka nk'ekigumire munonga kwikiriza, kwonka gari amazima," n'ahabw'ekyo ekigumire munonga kushoboorora obwo nikyo kimwe n'eky'amahano. Ekigumire munonga kushoboorora n'obu ekintu eki-ekirikushusha oti tikikaabaasa kubakwo, omu-omu bwengye bw'obuntu; buzima kigumiire kimwe kwikiriza, kwonka nabwo kihamiibwe ku n'amazima. Hati, eky'amahano nakyo nikwo kiri, ahakuba eky'amahano tikirkubaasa kushoboororwa. Eky'amahano n'ekintu ekirikubaho, kandi otarikubaasa kukishoboorora, ekyo kikhindura ekigumire munonga kukishoboorora. Kigumire munonga kwikiriziba, kwonka nabwo n'amazima.

Hati, abantu eriigyenda, abantu baingi b'omurembe, nibaikiriza ngu ebiro by'eb'yamahano bikahwaho. Tibarikwikiriza ngu e-eb'yamahano biriho. Kwonka, nabwo, niinyikiriza ngu ensi ejewiremu eby'amahano. Niinyikiriza ngu ekigumire munonga kushoboorora kituuraho obutoosha.

9 Eky'okureeberaho, niinyikiriza ngu buri memba w'Omubiri gwa Kristo ozairwe obwa kabiri agumire munonga kushoboororwa. Niinyikiriza ngu buri omwe omuriimwe Abametsodisiti n'Abapuresibateeeri hamwe n'Abaaluteeri, abatakatungahoga obumanyi bw'okubatizibwa kw'Omwoyo Orikwera, abaabaire bari omu kanisa efukire etarikwikiririza omu Kuzaarwa busya kw'amazima, kwonka hati abaaherize kutunga okubatizibwa kw'Omwoyo Orikwera, n'eky'okureeberaho ekihikiire kimwe ky'ekigumire munonga kushoboorora. Ahabw'okuba, hariho ekyakubaireho, ekyakuhinduriire kimwe, kandi omuntu weena naabaasa kureeba ekyo reero amanye amakuru g'ekigumire munonga kushoboorora: eky'amahano.

Ekyo kyaba kitabaireho, torikubaasa kuba Omukristaayo. Nihateekwa kubaho ekigumire munonga kushoboorora, kugira ngu obe Omukristaayo. Habw'okuba, tihariho n'omwe orikubaasa-orikubaasa kuhindura omutima gw'omuntu, kandi akamuha Okuzaarwa busya, atari Ruhanga. Ruhanga wenka Niwe wenka orikubaasa kukikora. Kandi n'eky'amahano oku Ruhanga arikubaasa kukwata emiteekatekyere y'omuntu, n'emihanda ye, n'amagara ge, na buri kimwe, akabihindura okuruga oku bitwire biri, bikaba oku bishemereire kuba, oku Arikubaasa kukikora.

10 Eky'okureeberaho, ebiro bikye ebihweire, bakaanyeta kuza omu-omu mwanya gumwe, nimmanyisa hakaba hariho ekintu ki-kikye ekyabaire nikigyenda omumaisho. Hakaba hariho omutsigazi murungi, omwojo murungi munonga, akaba naagyenda n'omwishiki muto, omwishiki muto murungi munonga orikuruga omu ka nungi. Kandi omwojo ogu, kitaraariire, yaagira ekiteekateeko, reero yaamureka. Akakorera ogwo mwishiki muto ekintu kibi, ahabw'okuba akaba amuraganiise kugira eki yaamukorera kwonka bwanyima tiyaakikora. Kandi omu mwanya gw'okwija ahari ogwo mwishiki akamushaba okusaasirwa, nk'oku o-omushaija orikutwaza gye ashemereire kukora, we, kikaba kitamurimu kukikora.

N'ahabw'ekyo ishe na nyina bakaanyeta kuzayo, baagira bat, "Nitwetenga kumanya eki omwojo waitu abaire."

Hati, tikyanguhi kukora obumwe n'obumwe, kwonka nooteekwa kuba ow'amazima kandi omwesigwa. N'ahabw'ekyo, ogwo mwojo akaba ari Omukristaayo, kyahika aha kuba omwikiriza. Akaba yaayeteisize kandi yaabatizibwa, kandi yaagira omwanya gwe omu baikiriza, kwonka akaba atakatungire okubatizibwa kw'Omwoyo Orikwera, n'obu yaabaire naateekateeka ata ngu amwine.

11 Iwe kuteekateeka ngu omwine, n'Okumugira, n'ebintu bibiri ebitarikushushana. Noobaasa kugyezaho kugira ngu omwine, kandi noobaasa kworeka ebirikuhamya nk'okucamukirira; kwonka amagara gaawe ku garaabe gatarikworeka eki orikwatura ngu oine, nooba Otakamutungire. N'obu waakugira okucamukirira okurikwingana kuta, n'obu waakuguruka munonga ota, okairuka, okacamukirira, okagamba omu ndimi, nari okateera akaari, nari kyona eki waakuba ohamiireho kyona; tibiine nshonga, ebyo byona nimbiikiriza, naanye; kwonka amagara gaawe ku garaabe gatashorongire n'obujurizi bwawe, obwo Tomwine. Ahabw'okuba, ebyana by'Omwoyo byoreka eki ori, nk'oku ebyana by'omuti gwona byoreka eki guri. Yesu akagira ati, "Muryabamanyira aha byana byabo."

12 Hati, abazaire b'omutsigazi ogu. Nyina n'Omugirimaani. Tindikugamba kubi aha Bagirimaani, kwonka omu ka egyo harimu omuze. Kandi, ogwo ni, nibafa kushutama aho, kandi noobaasa kugamba nabo, kwonka bakuhangye amaisho kusha. Baine . . . Murumuna w'ogu mwishiki, nyina w'omwojo ogu, murumuna we. Ndashuumire omu ruguuto rw'omu rurembo orwo, kaingi omu kasheeshe, kandi omukazi muto ogu aba ashutami aheeru aho omu mbuga, reero muramutsya nti, "Oraire gye, nyabo?" Ampanga amaisho kwonka. Kandi nyemerera, ngira nti, "Buzima n'akasheeshe karungi." Ayemerera aho kwonka, akuhanga amaisho; omukazi oine obwengye. Reero ngira nti, "Rimwe oije otutaayaayire." Aguma aho ayemereire naareeba kwonka. Mpaho, barumuna be nikwo bari, ishe na nyina nikwo bari.

13 Hati ishe w'omwojo ogu, n'omushaija w'omu ruganda rw'aba Irish kashushu, naarahuka kwiririmba aha

maisho, kandi naarahuka kugira ekiniga kingi, n'okugwisibwa kubi munonga. Eka ye yoona nikwo eri, kureka omwe wenka omuri egoy ka, owaahindwirwe. Hati omuri eki, omwojo ogu . . .

Ishe ogu na nyina, bombi n'Abakristaayo, baijwire Omwoyo Orikwera, kandi bakakuriza omutsigazi ogu omu muhanda gwa Mukama. Mbwenu hati omutsigazi ogu ahikize nk'emyaka ikumi na mushanju nari ikumi na munaana, nk'egyo, omwana murungi munonga, kandi atwire-atwire ari eky'okureeberaho kirungi munonga omuka, omwana murungi. Kwonka aine omurumuna otari nkawe.

Kwonka abaishiki bo, eka ya nyina, nibatuura haihi n'e . . . ekanisa nungi. Kwonka nooteekateeka ngu nibabaasa kuzayo? Ngaaha. Kandi nibamanya ngu Kihikire, kwonka tikibarimu na kakye ku-kushaba okusaasirwa nari kweteisa. Tibarikubaasa kukikora na kakye. Tikibarimu.

14 Hati akarondo k'okwijkuruza akari omuri ishe na nyina b'omwojo ogu, n'obu baraabe baahindwirwe bata, omwojo ogu akiri omubiri ogu baazaire. N'ahabw'ekyo, omwojo ogu agumire, nk'ekika kya nyina, kandi tibakaasaasira, tibakaashaba kusaasirwa, kandi omwojo ogu nikwo ari.

Hati, nkagambira ishe nti, "N'obu oraabe waamworoire kurungi munonga ota . . ." Naagira nti, "Hati yereebe, omu ka yaanyu: boona, n'abasinzi, kandi-kandi n'abarwani, nibarasha, nibatema, n'ebindi."

Naagambira nyina nti, "Hati reeba eka yaanyu." "N'ekibiina ky'abantu, abarikufa kushutama aho batagire eki baagamba, buzima nibeetegyeka, n'ebindi, tibarikuta mutima aha by'ediini. Kwonka," naagira nti, "iwe tikwo ori. Niiwe wenka omuri banyaanyoko na barumuna baawe boona, kandi ori murungi, omunyambabazi, kandi noosaasira. N'enki ekirikukikora? Kandi ori ow'oruganda orwo, beitu kandi okaheebwa Omwoyo Orikwera. Ekyo nikyo kintu ekyatumire waayoroba kandi waaba murungi. Tokiri ow'ekika ky'abantu baawe bundi, ni Kristo waawe otwire omuriwe."

Naagambira omwojo ogwo nti, "Reeba ekika kyanyu, haihi boona n'abasinzi, n'ebindi." Naagira nti, "Kandi nibairimba ahamaisho, kandi-kandi nibarahuwa kugira ekiniga kingi, n'okugwisibwa kubi munonga, kwonka iwe tikwo ori. Ori omunyambabazi, noosaasira. Niki? Omwoyo Orikwera. Tokiri iwe ori; ni Kristo ori omuriwe." Naagira nti, "Hati ekyo kintu kishemereire kuba ahari mutabani waawe."

15 Reero ishe yaimuka kandi yaagira ati, "Mutabani wangye akaza ahari rutaari. Akabatizibwa omu buryo obuhikire, omu Iziina rya Yesu Kristo, kandi yaabatizibwa omu maizi omu kiyanja." Yaagira ati, "Nimmanya ngu mutabani wangye akaakiira Kristo."

Naagira nti, "Ekyo nikibaasa kuba kirungi, obubonero oburikureebwa. Naabaasa kweyoreka nk'omwikiriza n'abaikiriza. Kwonka ku araabe atahindwirwe musya, atazairwe obwa kabiri, nkaahabwire omutsigazi ogwo ngu atarigyezaho kutaasya omukazi. Aryabeera ogwo mukazi Gehena omu nsi, okuhitsya obu ogwo Mwoyo wa Kristo orikutwaza gye, murungi, orikusaasira araataahemu. Reero ekyo nikiza kuba ekigumire munonga kushoboorora, kutwara obwo buhangwa bwonyini bw'omwojo owaazairwe ishe na nyina. Kandi obwo, omu bwengye bwe, ogwo mwojo naagyezaho nk'oku arikubaasa kukisingura. Tarikubaasa kukisingura. Taribaasa kukisingura. Kristo niwe oraakisingure. Ku arakirize Kristo akataahamu, obwo naija kuba yaasingura. Buzima nikiba ekigumire munonga kushoboorora, omuntu ku azaarwa Omwoyo wa Ruhanga.

16 Ndareebire abakyemi nibeemerera hangahari kandi bashekyerera, kandi batwaza kubi, okusisiimuka kw'Omwoyo Orikwera. Kwonka ahanyima y'obwire bukye, Ruhanga akwata omushaija ogwo amuhindura, kandi ngugu hanu ayemereire aha kituuti honyini naabuurira ekintu nikyo kimwe eki yaabaire naayanga okubanza. N'ekigumire munonga kushoboorora, oku Ruhanga arikubaasa kukwata otarikwikiriza akamuhindura omwikiriza.

Hati niinyebuuza, omuntu ku araabe naateekateeka ngu eby'amahano bikahwaho, niinyebuuza ni mubazi ki gwa sayansa ogu waakubaasa kuha omuntu w'omuringo ogwo kuhindura emiteekateekyere yaabo, kwihamu egoy rwango n'eitima n'empaka, bikarugamu? Tihariho n'omwe orikubaasa kukishoboorora. Kwonka n'ekigumire munonga kushoboorora, ahaw'okuba n'eky'amahano kya Ruhanga. Omuntu ku ahinduka akareka kuba nk'oku abaire ari, akaba ekihangirwe kisya omuri Kristo Yesu, naahinduka ekihangirwe kisya. Naaba atakiri nk'oku yaabaire ari. N'ekihangirwe kisya omuri Kristo buzima.

17 Ensi egi yo yonka, ei tutwiremu, buzima egumire munonga kushoboorora, oku yaahangirwe. Nitushanga, omu kitabo ky'Abaheburaayo eshuura ya 11 hamwe n'omushororongo gwa 3, ngu, "Ensi ekahangwa Ekigambo kya Ruhanga." Ruhanga akaiha nkahi eby'okukora ensi egi? Akakikora ata? Baiburi neegira ngu "ekakorwa kandi yaahangirwa hamwe." Orukanga rwayo rwona n'ebicweka byayo bikateebwa hamwe Ekigambo kya Ruhanga. Ekyo ku kiraabe kitari ekigumire munonga kushoboorora, tindikumanya ahu kiri. Ni nkahi ahu turikubaasa kworeka haza tukagira ngu niho Yaihire eby'okukozesa, kunu eby'okukozesa byabaire bitariho? Naateekwa kuba yaagambire ekabaho. N'ekigumire munonga kushoboorora, okureeba ngu ensi egi eriho ekiro eki.

18 Ekindi kintu, n'ekigumire munonga kushoboorora oku eguma omu muhanda gwayo, neereereeta omu kaabunga. Neebaasa eta kureereeta omu mwanya ogwo gumwe, neeyetooroora eti, nka mahiro rukumi na igana omu shaaha emwe? Mahiro emitwaro ebiri n'enkumi ina nari emitwaro ebiri n'enkumi itaano okwehinguririza, kandi eyetooroora buri shaaha makumi abiri na ina, ehikiire kimwe okuhitsya obu etarikubaasa kurenzyaho esekenda. Okwetooroora kwayo kuhikiire kimwe, okukira ahari . . . Okukira ahari mahiro rukumi buri shaaha,

neeyetooroora eti, neereereeta omu kaabunga. Kuri neeza ahaiguru nari ekashuma, kimwe ahari ebyo, ahabw'enki, mugyenzi, kika-kikaatabangura enkora yoona ya Ruhanga ey'ebirikwetoroora izooba. Kandi eraba ahashungaine n'omuhanda gw'eizooba, eyetoroora omu muhanda gwayo emirundi, obwire oburikwingana omwaka, teremwa, obunaku buhikira kimwe.

Ngambira n'oha ogikwatira ahaiguru okwo, n'enki ekigyetoorooza omu bwire obuhikiire kimwe. Noobaasa kugura eshaaha; tindikumanya ezi waakubaasa kugishashurira, doola rukumi; kwonka ego shaaha, omu bwire oburikwinga okwezi kumwe, neeza kunaga edakiika nyingi. Tibaine ekintu ekirikubaasa kukora omu buryo obuhikiire kimwe, kwonka ensi egi neeyetoroora omu buryo obuhikiire kimwe. Ahabw'enki? Ni Ruhanga orikukikora. N'ekigumire munonga kushoboorora. Ruhanga akagiragiira kukikora, kandi neekikora.

19 Kandi shi okwezi? N'obu kuraabe kuri hare n'ensi mahiro miriyoni na miriyoni, kwonka nabwo ni-nikutegye ka ebingonzi aha nsi. Mahiro miriyoni na miriyoni hare, obushoborozi bwakwo, bw'okwemerera omu mwanya gwakwo. Kwaba kwemereire omu muhanda gwakwo, nikutuma haagira ekyakorwa omu nsi. Buri nsi y'omu kaabunga eine obushoorozi aha ndijo, yaaba eri omu mwanya gwayo.

Oo, ka n'eishomo eri naakubaasa kwiha hanu, eky'okwegaho! Oku ngu buri kihangirwe kya Ruhanga kuri nikiguma omu mwanya gwakyo, kikaagira obushoborozi ahari kigyenzi kyakyo. Kwonka niturahuka kukwatwa ekiniga kingi hamwe na hamwe, reero tukora ekigombe ky'ediini kandi twebaganiisamu, orikushusha oti titwine okwo kwikiriza, bwanyima kituma entwaza y'Obukristaayo yoona yaaba orujwangye. Kuri buri muntu naaguma omu mwanya gwe, kikaaba ekigumire munonga kushoboorora kya Ruhanga, okureeba oku Ruhanga arikubaasa kureeta Abapuresibateeri, Abaluteeri, Ababaputisiti, Abametsodisiti, Abakatoriki, boona hamwe. Kuri nitugaruka aha Kigambo kya Ruhanga, buzima kikaaba ekigumire munonga kushoboorora. Obwo ekanisa yoona ekaabaasa kwikirizana, atari aha nyikiriza zaawe n'ebindi, kureka aha Kigambo, oku Kihandiikirwe. Ahabw'okuba, "Ti ky'okushoboororwa omuntu nk'oku arikweyendera," nikwo Ekyahandiikirwe kirikugira.

20 Oku okwo kwezi kwine obushoborozi aha nsi! Hanu enshumi nkye ehwiringe, munywani wangye, mutaahi wangye, akaba naatimba ebiina naasherura amaziba ga peteroori, eifo omu kyanga kya Kentucky. Kandi okwezi ku kutandika kuturuka omu kicweka ekyo, ekyo kingonzi kihika hoona omu nsi yoona. Ago maizi g'omwonyo, ahansi omu kiina ahu baatimbire, nigaijura okwo kwezi ku kuturuka. N'obu haakubaho ki, n'obu gaakuba gari okuzimu fuuti amagana n'amagana . . . nari ahaiguru aha nsi hanu. Nigaza okuzimu fuuti amagana n'amagana, kwonka nabwo, okwo kwezi ku kwetoroora, ago maizi garugayo kukubugana. Nikwo kyabaire.

21 Torikubaasa kugira eki waashereka, Ruhanga yaaba akiragiire. Nikiteekwa kworobera Ruhanga, Ruhanga ku aha ekiragiro Kye. Egyo niyo nshonga erikutuma naamanya ngu Naija kugira "Ekanisa etaine ibara n'obu gwakuba omufunya," Ruhanga akaragiira ngu kibe kityo. Neeteekwa kubaho. Ruhanga naija kugigira, 'habw'okuba Ekigambo kya Ruhanga nikwo kyagambire.

Oku ebingonzi, okwezi, na buri kimwe, bigira obushoborozi aha birikuba aha nsi! Eky'okureeberaho . . .

22 Nitureeba ekibonwomwe, tukyeta enyonyoozi. Ekyo ti kibonwomwe. N'ekyererezi. Buzima, ekyo nitukimanya, kwonka tukyeta enyonyoozi. Egyo nyonyoozi terikubaasa kuza hare etyo. Kuri enyonyoozi emwe neeruga omu muhanda gwayo, obundi ekaatuma buri kintu kyona eky'omu kaabunga kyaruga omu buteeka bwakyo, omu byahangirwe byona eby'omu kaabunga. Eego. Ekyo kikaareetaho akatabanguko. Buri kimwe kishemereire kuguma omu mwanya gwakyo, kugira ngu enkora ya Ruhanga egumizemu.

Naitwe nikwo turikuragiirwa kuguma omu mwanya gwaitu, nituteekwa kuguma turi nka batabani na bahara ba Ruhanga. Kuri tutaragwire enyima okwo, kikaabaire nikigumizamu, tihaakubaire hariho okufa nari ekindi kyona. Kwonka Ruhanga aheebwe ekitiinisa, ekigumire munonga kushoboorora nikiza kubaho, obu Ruhanga We wenka araate ekanisa omu mwanya gwayo ahu eshemereire kuba. Eego, ekigumire munonga kushoboorora.

23 Omuntu otarikwikiririza omu-omu kigumire munonga kushoboorora, kandi otarikwikiririza omu by'amahano, okaabaasa ota kugira ngu oine obwengye, kunu orikureeba butunu ebintu ebi otarikubaasa kushoboorora? Tikirkubaasika na kakye omuntu weena kushoboorora oku ensi erikubaasa kwetoroora kandi ekaguma neehikiiriza obwire kurungi, kandi (n'ebindi) ebirikwetoroora eizooba hamwe n'ebintu ebyo, kandi n'oku okwezi kurikubaasa kugira obushoborozi aha nsi. Kandi ebintu ka ni bingi ebi twakubaasa kugambah!

Oku a-amaizi g'omuti omu bwire bw'ekyanda gashuma omu mizi y'omuti, hatariho obwengye bwona bw'omuntu obutuma gaashuumayo, gakagaruka omu bwire bw'okutooka kw'ebimera, gaine amagara masya, ahabw'enki, n'ekigumire munonga kushoboorora. Tihariho omuntu orikubaasa kukishoboorora. Titurikumanya oku kirikukorwa. Kwonka Ruhanga naakikora, n'ahabw'ekyo n'ekigumire munonga kushoboorora, obwire bwona. N'enaama oku Ruhanga akora ekyo. Tukireeba munonga okuhitsya obu kiba eky'obutoosha. Tukireenza amaisho.

Kandi ogwo nigwo murabanamu gwa (itwe) Abapentekoote. Tureebire Ruhanga naakora ebikumire munonga kushoboorora okuhitsya obu tubiteekateekaho rimwe na rimwe kusha. Kuri nitwemereraho akaanya kakye konka haza tukabiteekateekaho! Ruhanga ari hoonahoona. Ruhanga na-naakora. Kandi eshaaha Ye eya ira eriyo neeteera gye buzima, okuhitsya obu aha muheru eriza omu Butahwaho buzima, ahabw'okuba ekyo Ruhanga akaraganisa kukikora. Hati nitumanya ngu hariho ekigumire munonga kushoboorora.

24 Hati, enyima okwo omu biro bya Noa, enjura etakagwire, n'omwegyemure. Kikaba kiri ekintu e-ekigumire buzima ahari Noa, omuri obwo busingye bw'okumanya kwingi obu yaabaire atwiremu, kugyezaho kugambira abantu, kurabira omu Kigambo kya Ruhanga, ngu enjura ekaba neeza kugwa. Hati kikaba nikiza kuba, hatariho okubanganisa, ngu tikiraikirizane n'e-n'engyenderwaho y'okusheruririza kwabo kwa sayansa. Hakaba hatariyo njura ahaiguru okwo omu mwanya. Kwonka, nooreeba, Noa akagira ngu enjura eryagwa ahabw'okuba Ruhanga akagira ngu enjura eryagwa. N'ahabw'ekyo Noa, ahabw'okwikiriza, enjura etakabaire n'okugwa, akagira ngu neija kugwa.

Egyo niyo nshonga erikutuma twagamba ekintu nikyo kimwe. Ekyo, nibagira bati, "Ahabw'enki, Yesu, hahweireho obwire buraingwa munonga bagizire ngu Aryaija. Emyaka amagana n'amagana ehweireho, bakagira ngu Aryaija. Entumwa nikwo zaagizire; obundi omu busingye bwazo." Ekyo tikirikukyemereza na kakye. Na hati nitumanya ngu Aryaija. Nikiza kubaho kita? Tindikumanya. Kwonka Ruhanga Aryamwohereza. Akaraganisa kukikora, n'ahabw'ekyo nimmanya ngu Aryaija.

25 Hati, Noa akaba naabaasa kugamba kwonka ati, "Ruhanga nikwo agambire." Kwonka, nooreeba, obwo, n'obu kiraabe, kikaba kitarikwikirizana n'ebya sayansa byabo by'obwire obwo. Kwonka obunaku ku bwahikire bw'okuhikirizibwa kw'Ekigambo ekyo, ekagwa, n'obu kiraabe. Ekyo kikaba kigumire munonga kushoboorora omu biro ebyo, kuteekateeka ngu enjura ekaba neebaasa kuruga omu mwanya ekagwa, kunu enjura yaabaire etariyo.

Kwonka waikiriza eki Ruhanga yaagamba, Naabaasa kukora, akore ekigumire munonga kushoboorora. Naabaasa kukora eky'amahano. Kandi omuntu weena ozairwe Omwoyo ogwo okora eby'amahano, ahabw'enki, n'ekintu ekyanguhi ahariwe kwikiriza eby'amahano, ahabw'okuba n'orugingo rwa Ruhanga. Amiina.

Mutabani nari muhara wa Ruhanga; atari ahabw'ekigombe ky'ediini, atari ahabw'enyikiriza, atari ahabw'okukwatana omu ngaro; kureka ahabw'okuzaarwa, ngu okafa aha bwengye bwawe, kandi waazaarwa Omwoyo wa Ruhanga. Kandi ori ekigumire munonga kushoboorora, iwe wenka, oku ohindwirwe kuruga omu kufa okataaha omu Magara. Hare omunda yaawe harimu ekihangirwe kisya omuri Kristo Yesu. N'ekigumire munonga kushoboorora.

26 Ruhanga agamba Ekigambo Kye, abaana Be Bakiikiriza na Ruhanga. Sayansa terikubaasa kworeka oku kirikubaasa kukorwa; tihaine eki barikukimanyaho. Kwonka abaana bakiikiriza, n'obu kiraabe, reero Ruhanga akora ekigumire munonga kushoboorora, atuma kyabaho. Atuma kyabaho, ahabw'okuba Ekigambo Kye ekyagambire ensi ekabaho, nikibaasa kureeta, nikibaasa kutuma buri kigambo, eki Yaaraganiise, kyabaho.

Egyo niyo nshonga Abrahamu atarabanganiise okuraganisa kwa Ruhanga, ahabw'okutaikiriza, kureka akamanyira kimwe ngu eki Yaagambire ngu Aryakora naabaasa kukikora n'okukihikiiriza. Tarabanganiise okuraganisa kwa Ruhanga, n'obu yaahikize emyaka igana, na Saara makumi mwenda, kuzaara omwerefere ogu. Ahabw'okuba akaba naamanya ngu Ruhanga akaba naabaasa kukora kandi (n'okukora) kutuma ekigumire munonga kushoboorora kyabaho aha kintu, eky'amahano kubaho, kandi Akakikora.

27 Abaheburaayo. Hati okaikiririsa ota sayansa eriizooba ngu omuntu naabaasa kuza omu kikoomi ky'omuriro? Oo, nkaagira obwoba kuteekateeka oku ogwo muriro gwabaire nigubuguma munonga; kwonka bakaba nibabaasa kuza omuri ekyo kikoomi ky'omuriro enyima okwo, omu Kitabo kya-kya Danieli, kandi baguma omu kikoomi ky'omuriro ekyo okuhitsya obu baateekateekire ngu we, ngu boona baahiire baaba eiju. Eki, nangwa n'abo bashaija, eihe ry'amaani ry'abaserukare, abashaija b'amaani munonga abaizire aho ku-kubanaga omu kikoomi ky'omuriro, abo bashaija abaabanagiremu bakacwekyerera, ahabw'ekibabo ky'omuriro ky'amaani ekyabookize. Kandi baagwa omu kikoomi ky'omuriro, baamaramu obwire obu bwona, kwonka baarugamu n'ekibabo ky'omuriro kitarikubanuukaho.

Ruhanga, naakora eky'amahano! Ekyo kikaba kiri ekigumire munonga kushoboorora eky'amazima, ky'amaani ga Ruhanga agarikurinda, kuzibira omuzigu, omuntu yaaba ayeteekateekire kwikiriza ngu Ruhanga n'ow'amazima. Kandi Ruhanga arinda Ekigambo Kye kandi aha ekitiinisa abo Abarikumwikiriza. Buzima niinyikiririza omu kigumire munonga kushoboorora.

28 Yoshua, omurwani mukuru ou naaheza kushomaho, omwanya mukye ogwahwaho, omu Kitabo kya Yoshua, eshuura ya 10. Yetegyereze, Yoshua akaba a-ari munywani wa Ruhanga. Akaba ari omuserukare, o-omukuru w'eithe, kandi akatendekwa nabi, Musa. Kandi Musa akaba yaaherize kutwarwa, reero Yoshua yaaragiirwa kutwara Abaisraeli omu nsi eyaaraganisiibwe, n'okubaganisa ensi. Okugoma kw'Abaisraeli; kandi na Musa akaba yaabaire omugurusu, n'ahabw'ekyo Yoshua akarugayo kuza omu mwanya gwa Musa, kuba omukuru w'eithe rya Ruhanga.

N'ahabw'ekyo Ruhanga akagamba nawe, kandi yaagira ati, "Nk'oku Naabaire ndi na Musa, nikwo Ndigunga naiwe." Ekyo ni kirungi munonga ahari Yoshua. Yaagira ati, "Ba ow'amaani munonga kandi ogume, ahabw'okuba Mukama Ruhanga waawe aryaguma naiwe, ei oriza yoona. Kandi omwanya gwona ogu oriribatamu n'ebigyere byawe, ogwo Ndyagukuha." N'ahabw'ekyo, endibatiro zikaba nizimanyisa obuhunguzi. Egyo nsi yoona ekaba eri eyaabo. Kukaba kuri okuraganisibwa.

29 Kare munonga kitakabaireho, ku yaashuumireyo ari na Kalebu hamwe n'ezindi ntatsi, kandi ku baareebire ab'okubarwanisa bari ab'amaani, Abaamaleki, n'A-n'Abaperizi, n'Abahiiti, n'abandi, boona batwire omu ndembo

ezeehinguririziibwe engo z'amabaare, kandi aho ahari Yeriko bakaba nibabaasa kukoreraho empaka z'ebigaari ebirikukururwa embaraasi zikairukira ahaiguru y'orugo rw'amabaare orwelinguririize o-orwo rurembo, kandi bakaba bari abashaija b'amaani munonga. Okuhitsya obu, bamwe ahari abo a-abatarikwikiriza omuribo, baagizire bati, "Ahabw'enki, tureebekire nk'eseenene aha rubaju rwabo."

Kwonka Kalebu na Yoshua, baagira bati, "Nitubaasa kugisingura nangwa n'okukiraho."

Ahabw'enki? Ruhanga akagira ati, "Ensi egi Ngibahaire." N'obu abazigu baraabe baabaire bari ab'amaani munonga bata, oku baabaire bari ab'amaani kandi-kandi n'o-n'o-n'oku baabaire nibareebeka bagumire munonga, kwonka Ruhanga akaba yaagambire ngu n'eyaabo. Oo! Ruhanga naabaasa kuhikiiriza eki Yaaraganiise.

Kikaba kigumire munonga kushoboorora, okureeba abantu bakye, abataine eby'okurwanisa, haihi, kureka ebi baabaire batorotoire okwo omu mahamba, hamwe n'ei baabire babingire abandi bantu, obundi nibakozesa eshando n'emisimeeno ekuzire, na byona ebi baabaire nibabaasa kutunga. Baazayo bateera abo bashaija babamaraho, abaabaire bari ebikaaka. Kikaba kigumire munonga kushoboorora. Ruhanga akaba naamanya ngu baine obumanzi bw'okukikora. Reero yaabaraganisa, n'ahabw'ekyo baazayo bakora ekyo kyonyini eki Ruhanga yaabaraganiise kukora.

30 Eizooba rimwe, orugamba ku rwabaire orw'amaani, obu abagabe baabaire bakozire hamwe endagaano y'amaani kandi bashuumire kurwanisa Yoshua n'Abaisraeli. Kunu, Ruhanga akaba abaraganisi eego nsi. Kandi akaba atuntumwire abo bazigu, kandi bakaba bari omu mahamba n'omu bibungo, bataataaniire okwo omu ihamba, reero Yoshua yaimutysa amaisho ge yaareeba eizooba nirirengarenga. Akamanya ngu ago mahe ku garaatunge omugisha gw'okweteeranira hamwe kandi-kandi gakagaruka kumurwanisa, ahabw'enki, akamanya ngu akaba naaza kuremeererwa munonga munonga kandi ngu shana akaba naaza kufeerwa abandi barwani, ku baakubaasa kweteerana hamwe.

31 Aho niho, abaheereza, aho niho turemerwa. Aho niho ekanisa ereemerwa. Obu okusisiimuka oku oku tuhereerukire kutunga, egi hururu y'okubuurira kw'amaani ebugire eihanga ryona, obu twabaire tubingire omuzigu, tukaba tushemereire kuguma tumubingire. Kwonka, oku kiri, nituteekwa kurahuka kugira ekiniga kingi n'ebindi, n'omuzimbwe gw'okwombeka n'amaani munonga hamwe "n'okukorera ebibiina byaitu ebintu bingi," hamwe n'ebindi. Kandi aho niho mwahikire, kandi twayetaanisa n'Ekigambo, reero twatwara eki, kiri, bwanyima ebibiina by'amadiini gaabo mwayongyera kubyombeka, mwatandika ekindi kintu. Okwo nikwo kiba obutoosha. Okwo nikwo kyabaire omu biro bya Luteeri, Wesili, na Moody, Sankey, Finney, Knox, Kaluvini, n'okugumirizamu kimwe. Nikwo kituura kityo. Amaisho gaabo bagaiha aha ku-kusisiimuka, bagata aha kintu eki barikubaasa kukora ahabwabo.

32 Kwonka nimumanya ekyabaireho? Yoshua akaba atari muntu w'omuringo ogwo. Akaba naayetenga obwire. Eizooba rikaba nirirengarenga, kandi yaamanya ngu abazigu ku barayeshorooreze hamwe . . . Okusisiimuka kukaba kuri haihi kuhwaho, nk'oku turi eriizooba. Akamanya ngu ku araarindeho okuhitsya obu abazigu baraayeteeranire hamwe kumurwanisa, kikaba nikiza kuguma kusingura orwo rugamba. Nimumanya eki yaakozire? Akaba naamanya ngu Ruhanga akabaraganisa eego nsi. Akaba naayetenga okwongyerwa obwire. Kandi eizooba rikaba niryenda kurenga, n'ahabw'ekyo yaagira ati, "Iwe izooba 'we, yemerera." Amiina. Ekigumire munonga kushoboorora, buzima. Kandi eizooba ryayemerera aho kumara omwanya gw'eizooba ryona, kandi tiryarugaho; n'okwezi ahaiguru ya Ayalooni, tikwarugaho, nakwo.

Ahabw'okuba, Baiburi hanu neegamba, ngu, "Tihariho obwire oburabaire nk'obwo omu bwabubandiize, nari kwiha obwo, oburikubushusha, obu Ruhanga yaahurira eiraka ry'omuntu."

Noogira oti, "Oo, kuri naabaire ntwire omu bwire obwo!"

Yesu akagira, omuri Mako Orikwnera 11:24 ati, "Ku origira orushozi oru oti, 'Tsinduka,' haza otabanganise mu mutima gwawe, kureka okaikiriza ngu eki waagamba nikija kubakwo, buzima oryakikorerwa." Zikiri embabazi, hamwe n'ekigumire munonga kushoboorora, okugumizamu kuhika omu busingye bwaitu. Buzima.

Okwo kwezi n'eizooba bikeemerera tibyarugaho okuhitsya obu Yoshua yaarwaine akasingura, na Israeli, kandi bakahoora abazigu baabo. Ahabw'enki? Kikaba kibaragiirwe.

33 Hati ku waakushohora aheeru hanu okagira oti, "Rushozi 'we, tsinduka! Niinyenda kubooreka ngu nimbaasa kukikora." Tirukaarugaho.

Kwonka kyaba kiragiirwe, Ruhanga yaaba akuragiire kugira eki waakora! Nk'oku yaagambiire Musa ati, "Ahabw'enki Nontakira? Gambira Abaisraeli."

abantu ebi nibataka obwire bwona bati, "Mukama, ekindi nkore ki, ekindi nkore ki?" Gamba kwonka haza ogyende omumaisho! Ekyo kihikire. Ruhanga aturagiire kugira eki twakora, ka tukikore. Reka kwemerera aho okakiteekateekaho, oti, "Nikiza kubaho kita? Mpaho, eki ni kiri." Kiine entaaniso buzima; Ruhanga ku araabe akugambiire ngu okikore, kikore n'obu kiraabe. Na hati ni Ruhanga w'ebi'amahano.

34 Yoshua, buzima kikaba kigumire munonga kushoboorora eizooba eryo ku ryayemereire. Rimwe nkaba

ningamba n'o-omunyasayansa omu ishomero, kandi akaba ari omwegyesa wa Baiburi. Reero yaagamba . . . Naamugambira eki. Naagira nti, "Naaba ningira ngu waagira ngu e-ensi ekeetooroora, waareeba, kwonka-kwonka eizooba ryo ryayemerera?" Naagira nti, "Kandi shi Baiburi ei mutugambira ngu n'amazima? Ruhanga . . . Yoshua akagira ati, 'Iwe izooba 'we, yemerera.'" Mpaho, ekyo tarabaasize kukigarukamu.

Kwonka izooba ryo rikeemerera. Tiryarugaho na kakye, nooreeba. Buzima ensi niyo yaayemereire. Kandi hati noogira oti . . .

Yaagira ati, "Ensi ekeemerera."

Naagira nti, "Ogizire oti, 'Ensi ku yaakwemerera, amaani gaayo agarikukura nigagarura ebintu aha nsi gakaahwaho reero buri omwe aruga aha nsi agwa kuri.' Mbwenu shi hati waaza kukora ki?"

N'ekigumire munonga kushoboorora. Amiina. Ruhanga akeemereza ensi yoona yaareka kwetooroora, amiina, ahabw'okuba omuntu akagira ati, "Yemerera aho otarugaho, okuhitsya obu ndaarwane orugamba oru nkasingura." Ekyo n'ekigumire munonga kushoboorora. Amiina.

35 Kikaba kigumire munonga kushoboorora obu amahe goona ga Israeli gaabaire gafundiriziibwe omu nshonda, kandi bakaba batiinire ekishaija ekyabaire nikishushana ekikaaka kihango ky'amaani ekyabaireho ebyafaayo bitakatandikire kuhandiikwa, ekyabaire nikyetwa Goliasi kyemereire aho. Kandi aho amahe ga Israeli, Saulo owaabaire atendekirwe gye, akaba naakira ihe rye ryona aha mutwe, nibamugarukira aha ibega, kwonka akaba naatetemera omu nkaito ze. Tihariho n'omwe owaabaire naabaasa kuza omu kasos k'omushaija ogu w'omuri eryo biro.

Kwonka hakaija omwojo muto, orikwera omubiri, omwojo oine amabega agarikubendabenda, aine nka kilo makumi ana na itaano, ayefubikire oruhu rw'entama atyo. Yaagira ati, "Mwashwara imwe ihe rya Ruhanga ohuriire; kufa kwemerera aha haza mukareka oriya Mufilistia otashazirwe kuhiga amahe ga Ruhanga ohuriire."

Ekyo kigambo ku kyahikire ahari Saulo, Saulo yaagira ati, "Okiri muto, kandi we n'omurwani okwiha omu buto bwe. Kandi iwe ori akaana, kwonka reeba oku ari. Ahabw'enki, torikubaasa kumuza omu kasos."

36 Kwonka akatwara ki? Taratwaire eicumu, taratwaire rurara, kureka akatwara kaaturi. Kandi omwanya gumwe gwonka gw'ekyo kikaaka ogu yaabaire naabaasa kuteera, hakaba hari aha buso honyini, ahu eby'okurwanisa bye byabaire bishweka aha buso bwe bikashereka amaisho ge. Kandi eryo ibaare, n'omwanya muraingwa okuruga aha icumu eryo rya fuuti ikumi na ina eryabaire riine omuhunda oguri nk'empitirizo eri yaabaire aine omu mukono gwe; ryona rikaba riri riraingwa ekirkumara, akaabaasize kucumita Daudi muto kandi amukora ekintu kyona, kandi amuhanika omu muti, nk'oku yaatiinisiriize kukora, reero enyonyi zirya omutumbi gwe.

Kwonka n'enki ekyabaireho? Hakabaho ekigumire munonga kushoboorora, obu Ruhanga yaakozesa omuntu muto owaabaire naayeera atari murungi w'okureebwa, na kakye, nangwa atari n'omuserukare otendekirwe, kureka akaana buzima akaabaire kaine okwikiriza Omuriwe, reero kakashwaza eihanga ryona. Ruhanga akakikora naarabira omu kigumire munonga kushoorora.

Amiina! Na hati Ni Ruhanga, ekiro eki, w'ebigumire munonga kushoboorora, nk'oku Yaabaire ari buri.

Akata eihe ryona omu katabanguko. Ekyo ku baakireebire, baatandika kwiruka n'okuhunga, ahabw'okuba bakareeba ngu omuri ako koojo hakaba harimu okwikiriza omuri Ruhanga Owaabaire naabaasa kuhindura eby'obuhangwa byona, akakora kyona eki Yaabaire naayenda kukora, omuntu ku yaakwikiriza Ekigambo Kye. Buzima. Niinyikiriza ngu kikaba kigumire munonga kushoboorora.

37 Musa, omushaija rugambwa omu mahe owaagyerezeho kucungura Abaisraeli, kwonka akaremwa. Akaba naayenda kuhwerekyereza Abanyamisri. Akaita omushaija omwe, kyamureetera oburemeezi, naakikorera omu kukunda kwe. Kwonka ku yaakwatsire enkoni, enkoni eya ira eyomire ei yaabaire atemire omu ihamba, akaita ihe ryona. Amiina. Ekyo ku kiraabe kitagumire munonga kushoboorora, tindikumanya ahabw'enki. Egyo nkoni ku yaagibangire ahaiguru y'enyanja, kandi ku yaagambiire egoy nyanja ngu amaizi gaagarukye hamwe; yaaroha Misri, eihanga ryona, omurundi gumwe, naakozesa enkoni omu ngaro ze. Amiina.

Kikaba kigumire munonga kushoboorora, oku yaayebembeire Abaisraeli kuraba omu ihamba, kumara emyaka makumi ana. Kandi ku baahikire seeri, tihariho n'omwe aharibo owaabaire ataine maani. Ekyo kigumire munonga kushoboorora. Eego, sebo. Ka yaabaire ari omushaija emanzi, ebi Ruhanga yaamukoreire, ahabw'okuba akaikiriza Ruhanga! Kikaba kigumire munonga kushoboorora. Eego, sebo.

38 Kikaba kigumire munonga kushoboorora, obu Ruhanga yaatoorana omushaija mukye omwe orikwetwa Mikaaya, omumaisho ga baanabi ba Israeli magana ana abatendekirwe gye, ahabw'okuba omushaija ogu akaba amaririire kuguma n'Ekigambo kya Ruhanga n'obu boona baabaire nibamuhakanisa.

Obu magana ana baagira bati, "Aaa, irooko ohurure!" Yaagambira ababu na Yehoshafaati ati, "Irooko ohurure, Mukama ari hamwe naiwe. Twaheza kutunga okushuuruirwa. Mukama ari hamwe naiwe. Irooko ohurure, noija kubabinga obaihire kimwe omu nsi yaitu, ahabw'okuba n'eyaitu. Ruhanga akagituha. Yoshua akagibaganisa, n'ahabw'ekyo egi n'eyaitu. Kwonka Abafilistia bagirimu eruguru okwo, nibarya ebicoori ebirikwera

omu misiri yaitu. Ahabw'enki, tikuri kuteebereza, okushuuuurirwa kwaitu kuhikire."

39 Reero oku Mukama yaatooraine omushaija mukye nka Mikaaya, owaabaire nangwa atarikubaasa n'okuza omu kibiina ekyo, kwonka akazayo eruguru okwo n'Ekigambo kya Mukama. Kandi yaagira ati, "Irooko ohurure, kwonka ndeebire Israeli etaataine nk'entaaezitaine muriisa." Kikaba kigumire munonga kushoboorora, oku Ruhanga yaabaire naabaasa kwemereza aho akashaija kakye munonga aku batarataireho mutima rwagati y'ekibiina kyona kihango munonga kya baanabi magana ana, baanabi b'Abaisraeli, baanabi b'Abayudaaya beemereire aho nibaragura ebishuba. Mikaaya akamanya ata ngu ahikire? Ahabw'okuba akaba ashorongire n'Ekigambo. Eliya akaba yaagambire ngu ekintu ekyo kikaba nikiza kubaho; mbwenu akaba naabaasa ata kuha omugisha eki Ruhanga yaabaire akyeenire? Kikaba kigumire munonga kushoboorora, kwonka Ruhanga akakihikiiriza. Buzima kikahikiiriza.

40 Kikaba kigumire munonga kushoboorora; obu omwojo mukye munonga, orikureebeka nk'omwishiki atsibire eishokye rye ebitsibo mushanju nibireereeta aha rubaju rw'omutwe gwe, obundi arisibiisize akatambaara kakye, oku ndikuteekateeka, nk'akaishiki kato. Eiziina rye akaba naayetwa Samusooni. Kandi entare, obundi, eine nka kilo magana abiri na makumi ataano, entare ku yaamutontomeire kandi yaamwizira, akakozesa engaro ze yaataagataagura egyo ntare. Amiina. Kwonka nooreeba ekyabaireho? Omwoyo wa Ruhanga akabanza yaamwijaho.

Ekyo nikyo kirikutuma ekigumire munonga kyabaho. Egyo niyo nshonga. Ekigumire munonga kushoboorora nk'ekyo nikibaasa kutuma omuriro gwayaka omu kishaayi ky'emizaano nk'eki, ekiro eki, n'ekitiinisa kya Ruhanga. Kuri rukundo ya Mukama naikirizibwa kwija aha bantu, obwo bakaashaba. Ekigumire munonga kushoboorora, buzima. Eego.

Samusooni ku yaitsire egyo ntare, n'engaro ze zonka, yaagitaagataagura; omwojo mukye munonga, orikutwaza nk'abaishiki aine obutsibo bukye mushanju by'eishokye nibureereetera aha mugongo gwe.

41 Kikaba kigumire munonga kushoboorora obu yaawkata eigufa ry'oruba rw'egyo ndogoya, akariteeza Abafilstia rukumi. Kunu, ezo nkofiira mpango z'ebyma n'eb'y'okujwara by'ebyma, bikozirwe omu byoma by'omuringa by'ekipimo obundi ekirikwingana na kilo makumi ataano, nari haihi kwingana zityo, engabo mpango n'ebindi, amacumu, abashaija abatendekirwe gye, n'enkofiira z'ebyma ziine omuzimba ogurikwingana na inci emwe n'ekicweka, gw'ekyoma ky'omuringa, zikaba zihika ahansi, hatsigara obuso bwabo bwonka. Kwonka Samusooni akeemerera aho n'eigufa ry'oruba rw'endogoya, rikaba rimazire aho obundi nk'emyaka makumi ana, nari makumi ataano, omu ihamba, ryomire, kandi okurikoozaho kakye aha kyoma batyo rikaba niriza kuba obucwanyagurika bwingi munonga. Kwonka akeemerera aho, nikyo ekyo kyonka, akaba atumirwe kurwana n'okucungura ihanga eryo. Akoororwa kandi yaazaarwa kugira ngu aite eihanga eryo. Haleluya!

Kuri ekanisa neemanya ahabw'enki muri hanu! Kuri ekanisa y'Abapentekoote neemanya ahabw'enki muri hanu? Nimujwekyera ki? Ahabw'enki mwarugire omu bintu ebi kugira ngu mube eki muri?

42 Akaba naamanya ekyatumire yaazaarwa. Akaba naamanya ahu ahamiire. Eki yaabaire akwatsire omu ngaro ze kikaba kitarikureetaho ntaaniso yoona. Akeemerera aho, obwo abo Bafilestia bariyo nibajia. Kandi okukoozaho n'amaani, kw'ako kashaija akagunire keemereire aha rukiri, kugira ngu kabaase kuhika ahaiguru y'emitwe yaabo. Ku baahikireho, akaba ateera orubaju rumwe, ahindukira orundi. Kandi aho hagwaho rukumi aharibo, barambiire aho bafiire. Kikaba kigumire munonga kushoboorora, oku eugufa ry'oruba rw'endogoya, ritracwekacwekire. Kikaba kigumire munonga kushoboorora, oku ako kagufa akaabaire kanguhi kucweka kaabaire nikabaasa kuteera ezo nkofiira z'omuringa eziine omugoma ogurikwingana na inci kandi kakoogamu reero kakaita abo Bafilestia, rukumi aharibo. Kandi ahanyima y'ekyo akaguma ayemereire aho akawatsire omu ngaro ze, kakiri nk'oku kaabaire kari obu yaakatoratoora. Kikaba kigumire munonga kushoboorora. Amiina kandi amiina!

Na hati tahinduka, oku abaire ari nyomwabazyo n'eriizooba nikwo ari, kandi nikwo ariguma ebiro byona. Na hati ni Ruhanga otahinduka, aha muntu weena oyetsirwe kutwara Ekigambo kya Ruhanga. Ruhanga naija kumushagika ku araabe atabaire omunyabwoba. Samusooni akaabaire yairukire, kwonka tarakikozire. Kihikire.

43 Kikaba kigumire munonga kushoboorora, Ruhanga ku yaayetsire Yohaana Omubatizi, mutabani w'omunyamurwa, okuruga omu ishomero rikuru ry'abanyamurwa, seminariyo nkuru. Ahabw'enki ekyo kitarakuratiirwe? Kunu, gukaba guri omucwe gwabo ngu abashaija bakuratire omwoga gwa baishebo. Ahabw'enki, kikaba kigumire munonga kushoboorora, obu Ruhanga yaatwara Yohaana omu ihamba, kumugambira eki Mesia yaabaire naija kuba ari, kumugambira oku akamanyiso ka Mesia kariba kari, oku yaabaire naaza kukimanya. Omu mwanya gw'okuza omu ishomero, kwega Mesia eki ariba ari; Ruhanga akamutwara omu ihamba, kumugambira eki Mesia ariba ari. Kikaba kigumiire kimwe kushoboororera, aha bantu b'omu biro ebyo. Eego.

44 Okuzaarwa omwishiki oshugaine ku kwabaireho, ekyo kikaba kigumire munonga kushoboorora; oku Ruhanga, okugira ngu Ayemanyise abantu, akaba omuntu. Oku Ruhanga, Omwoyo ogwo omukuru . . . Ahariinye, Ruhanga, akaba ariho; hatakabaireho nangwa n'omushana; hatakabaireho n'ekibonwomwe, hatakabaireho na a-a-a-atomu, hatakabaireho na molekyulu, ha-ha-hatakabaireho ekintu kyona, kandi Ruhanga akaba ari byona. Eego, okwo nikwo Ari mukuru. Akaba ari omu Butahwaho, yaagumizamu omu Butahwaho. Atuura ari Ruhanga. Aryaguma ari Ruhanga. Kandi oku Amagara agarikukirirayo kimwe obukuru gaahindukire eihuri rikye munonga

omuri nyinenda y'omukazi, kugira ngu Akwate ebiragiro Bye, ashashurire ekiheneso ky'Ebiragiro Bye, okufa; oku Ruhanga yaayorekirwe omu mubiri, oku Ruhanga omukuru w'Eiguru yaahindwire oburanga Bwe, akareka kuba Ruhanga, akaba omuntu, okurabira omu kuzaarwa omwishiki oshugaine, tihariho n'omwe orikubaasa kukyetyegyereza.

45 Sayansa ebiro ebi terikubaasa kukugambira oku okwo kuzaarwa omwishiki oshugaine kwabaireho, kwonka Ruhanga akakikora. Akaija. Tihariho n'omwe owaabaire naabaasa; buri omwe akaba azairwe okurabira omu kumanyana kw'omushaija n'omukazi. Nk'aba- . . . omuntu omwe akaba naashushana n'abandi boona, tihariho n'omwe owaabaire naabaasa kuhwera ondiijo. Twena tukaba turi omu kabi, reero Ruhanga We wenka yaashuumire ahansi kandi yaazaarwa, atazairwe Omuyudaaya, atazairwe Omunyamahanga, kureka Eshagama Ye ekaba eri eya Ruhanga. Eshagama eruga omu kishaija. Omuri eki, akaba ari Ruhanga, Ruhanga omuhangi, akahanga akatafaari k'Eshagama omuri nyinenda ya Mariamu, atyo Yaayeyombekyera eihema eri We wenka yaashuumire akatuuramu.

“Ruhanga akaba ari omuri Kristo, Naayegarurira abari omu nsi.” Ekyo kigambo Kristo kyo kyonka nikimanyisa “Ogwo Oshukirweho Amajuta.” Oo! Akaba ari Ruhanga, Obwaruhanga bwona bukaba buri Omuriwe.“ Amiina. ”Kandi Omuriwe nimwo Obwaruhanga bwona obureeberwa omu mubiri bwabaire buri.“ Ekyo kikaba kigumire munonga kushoboorora. Kikatuma abantu b'ebiro ebyo baabanganisa, ”Iwe ori omuntu, kwonka nooyehindura Ruhanga.“ Na hati nibakibanganisa. Kwonka nikyo kimwe, kikiri ekigumire munonga kushoboorora ekirikugumizamu. Akaba ari Ruhanga. Na hati ni Ruhanga. Aryaguma ari Ruhanga. Eego, sebo. Tahinduka, oku abaire ari nyomwabazyo, n'eriizooba nikwo ari, kandi nikwo ariguma ebiro byona. Eego, sebo.

46 Okwo kuzaarwa omwishiki oshugaine kukaba kuri enaama aha bantu, bakaba batarikubaasa kukwetegyereza, nk'oku Okuzaarwa busya kuri ebiro ebi. Okuzaarwa busya n'enaama aha bantu. Tibarikubaasa kukwetegyereza. Tibarikumanya eki orikumanyisa. Bakuhindwire busha, nibakugarura ahansi, nibagira bat, “Mpaho, ahabw'okuba noikiriza ekintu.” Baadaimoni baikiriza ekintu nikyo kimwe, kandi batetema. Eki orikwikiriza tikyo kikuru; kureka n'eki Ruhanga yaakozire buzima. Okuzaarwa busya n'okuzaarwa. Kukaba kuri kusya. Kikaba kugumire munonga kushoboorora, Ruhanga obu areetera oruganda rw'abantu Amagara masya. Kuganga, n'okutaana na Ruhanga Ebiro byona. Kugaakiira, n'Amagara Agatahwaho. Nooteekwa . . .

47 Oine obugabe nk'obu Adamu na Haawa baabaire baine. Noobaasa kutwara . . . Ruhanga ku yaakukutwaza okundi, kikaaba kitari ky'oburinganisa ahari Adamu na Haawa. Buri Adamu na Haawa, ekiro eki, baine ekihikire n'ekigwire omu maisho gaabo. Noobaasa kweshariram. Noobaasa kutwara Ekigambo kya Ruhanga nari otsigyeo Ekigambo kya Ruhanga. Noobaasa kutwara Ekigambo kya Ruhanga nari otware oku enyikiriza z'ebigombe by'amadiini gaawe Zirikukishoboorora. Noobaasa kutwara oku emiteekatekyere yaawe y'eriigyenda erikukyetyegyereza. Noobaasa kuzaarwa obwa kabiri kandi oijure Omwoyo Orikwera, nari ohindukye memba w'ekanisa enkomba, kimwe ahari ebyo eki orikwenda kuba.

48 “Nyowe okugumaho ni Kristo.” Haleluya! Niinyikiriza ngu Ruhanga ogwo owaashuumire aha Izooba rya Pentekoote, aha Kanisa Ye, nk'Enyomyo y'Omuriro, kandi Akeebaganisamu, n'endimi ezeebaganiisemu, omu bantu Be, ari hanu ekiro eki. Na hati ni Ruhanga nk'oku Yaabaire ari buri, n'eriizooba nikwo Ari, n'Omwoyo Orikwera ogwo omwe. Nimmanya ngu kigumire munonga kukishoboorora. Tikirikubaasa kushoboororwa. Okukyamukirira, okuteera akaari, okurira, n'ebindi, tibirikubaasa kushoboororwa, kandi kigumire munonga kushoboorora oku Ruhanga arikukikora. Ni Ruhanga otarikureebwa otwire omu mutima gw'omuntu, Naayeyoreka, okurabira omu kuhikiiriza Ekigambo Kye, ngu, “Tahinduka, oku abaire ari nyomwabazyo n'eriizooba nikwo ari, kandi nikwo ariguma ebiro byona.”

49 Kikaba kigumire munonga kushoboorora, obu mutabani w'omubaizi, owaabaire naayetwa Yesu owa Nazareesi, yaakwatsire otugaati twa bisukwiti tutaano n'ebi'nyanja bibiri, akagburira abantu enkumi itaano. Ku kiraabe kitagumire munonga kushoboorora, niinyenda kureeba omuntu naakikora eriizooba. Niinyenda onshoboororere ni ka atomu ka muringo ki aku Yaakoreise. Akakora ki? Ti by'nyanja byonka, kureka ebyo by'nyanja bikaba bikuzire, ebyo by'nyanja bikaba biine ebikoko, ebyo by'nyanja bikaba byogize, ebyo by'nyanja bikaba biteekirwe, ebyo by'nyaja bikaba biri oku byabaire biri kwona, kandi egoy migaaati ekaba ebibirwe kandi eyezire; kwonka ebyo byona akabiraba aha rubaju, reero Ruhanga yaabihindura okuruga aha kuba-okuruga aha kuba eby'nyanja ebiteekirwe byaba eby'nyanja biteekirwe. Akabikuza kandi Yaabibega, yaagaruka Yaabikuza kandi Yaabibega, reero Yaabikuza okuhitsya obu Yaagaburiire abantu enkumi itaano. Amiina.

Okwo kugarukagarukamu nikumanyisa ki: kubibega, kubikuza; kubibega, kubikuza; kugaburira, kubikuza? Ekyo nikimanyisa ngu Tahinduka, oku abaire ari nyomwabazyo n'eriizooba nikwo ari, kandi nikwo ariguma ebiro byona. Ni Ruhanga ogwo owaabaire ariho. Na hati Niwe Mugaati gw'Amagara aha muntu weena oine enjara n'eiriho. Torikubaasa kumarah oburungi Bwe.

Nibagira ngu, “Titukyenire eby'amahano, titukyenire ekigumire munonga kushoboorora.”

50 Ategyereize. Egyo ni puroguraamu Ye. Ekyo nikyo Ari. Tahinduka, oku abaire ari nyomwabazyo n'eriizooba nikwo ari, kandi nikwo ariguma ebiro byona. Akutegyereize kugira ngu otegye emikono yaawe oyakiire omugabio gwawe. Otiinire okukikora? Noohurira orikwenda ngu haakiri oshuumre eifo aha mugyera reero oshoheyo

eky'enyanja, kandi ogyezeho kukiteeka n'okukisiika omu majuta nk'ag'empunu nari agari nk'ago, nari nooyenda kukitwara nk'oku Ruhanga akiine? Tega emikono yaawe kwonka ahabw'okwikiriza, ogire oti, "Iwe Yesu, otahinduka nyomwabazyo, eriizooba, n'ebiro byona! Ninshaba, Mukama, niinyikiririza Omuriwe. Ntamu eby'okurya ebyo, ago maani, okwo kwikiriza oku ndikwetenga." Haza oreebe kandi oyetegyereze ekiraabeho. N'omutima gw'amazima, Naija kumaraho buri njara yoona. Naija kukikora.

Yesu akaba ari . . . akakora e . . . akakora ekigumire munonga kushoboorora, obu Agaburira abantu enkumi itaano, n'ebi'enyanja bitaano, re-reero bakatorotoora bakaijuza ebitenga bibiri, nimmanyisa ebitenga bingi, bwanyima.

51 Kikaba kigumire munonga kushoboorora, obu Omuntu oine ebogyere nk'ebi nyowe naiwe twine, kugyendera aha nyanja nk'Enyanja ya Michigan ebiso hanu, obu eihunga ryabaire niriteera, kandi eifuro ry'aha bingonzi obundi rikaba . . .

Mbwenu, ku oraabe oragiireyo haza okareeba oku eihunga eryo ririkuteera, na hati nirikiteera, Galilaaya okwo, kandi oshusha oti ryaza kweyerera egoy Nyanja mpango ritsigye eyomire. Eryo ku ryateire okwo, egoy miyaga ekateera n'amaani munonga, kandi ekatandika kuhuha n'amaani, ebingonzi ebyo ebiraho eifuro bikateera obwo bwato okuhitsya obu amatsiko goona gaahweire. Reero ahari egoy nyanja, omu baabaire nibavuga obwato, nibakoresa engahi okuruga nka shaaha ikumi z'eihangwe, nkaagira ngu, okuhitsya omu bunaku (bw'aha muheru) bw'abarinzi ba kana, nka shaaha mwenda nari ikumi z'ekiro. Ka baabaire bavugire bahikire hare aha nyanja! Kandi bakaba Bamutsigire aha rubaju ruri. Amiina.

Kandi omu bunaku bw'okurinda kwa kana, ngugu hanu Yaija, naagyendesa amaguru aha bingonzi. Ekyo kikaba kigumire munonga kushoboorora. Akaba naabaasa ata kwehindura otarikuremeera ekirkugasha? Akaba naabaasa ata kuribata aha bingonzi ebyo, kandi akaruga aha kingonzi kimwe akaribata aha kindi? Ebyo bingonzi bihangi bikaba bijja, Araba ahaiguru ya kimwe, aribata aha kindi, kimwe akiraba ahaiguru, hatariho eitondo ry'amaizi na rimwe Erimugiireho. Yaija, naagyendesa amaguru aha bingonzi! Kinshoboororere, kandi torikubaasa. Kikaba kiri ki? Kikaba kiri ekintu ekigumire munonga kushoboorora, buzima.

52 Kikaba kigumire munonga kushoboorora, obu Petero, ou Yaabaire atakareebaga omu magara Ge, akaba naayetwa Simooni, yaija omu maisho ga Yesu Kristo, ahabw'okuba murumuna we Anderea akaba amugambiire ngu Ni Mesia. Kandi Yesu ku yaareebire omushaija ogwo omu maisho, omurundi gw'okubanza kumureeba, yaagira ati, "Eiziina ryawe ori Simooni, kandi ori mutabani wa Yona," ekyo kigumire munonga kushoboorora. Ku kiraabe kitagumire munonga kushoboorora, kyo ngambira oku Yaakikozire. Kikaba kigumire munonga kushoboorora.

Ahabw'enki? Ahabw'okuba, Niwe Kigambo. Kandi Baiburi neegira ngu, "Ekigambo kya Ruhanga kiine obwogi bwingi okukira rurara y'amoogi abiri, kandi kirahuka kucaaka ebi omuntu arikuteekateeka n'ebi amaririire omu mutima gwe kukora." Ekyo kikahamya ngu akaba Ari Kigambo, amiina, "Tahinduka, oku abaire ari nyomwabazyo, n'eriiizooba nikwo ari, kandi nikwo ariguma ebiro byona."

53 Kikaba kigumire munonga kushoboorora, obu Filipo yaaza enyima y'akabungo akashangayo Nasanaeli, kandi akamureeta Omumaisho ga Yesu, reero Yesu akamugambira ei yaabaire ari ekiro ekihweire. Ekyo kikaba kigumire munonga kushoboorora, amiina, kikooreka ngu Akaba ari Kigambo. "Reeba Omwisraeli otaine buryarya."

Yaamubuuza ati, "Okaamanya ryari, Rabi?"

Yaamugarukamu ati, "Filipo atakakwetsire, obu obaire ori ahansi y'omuti, Naakureeba." Ekigumire munonga kushoboorora. Amiina.

54 Kikaba kigumire munonga kushoboorora, obu omushaija mugufu omushuubuzi, w'omu rurembo rwa Yeriko, owaabaire ahakanisa Mukama Yesu, yaatembire omuti gw'omusikamoori, kweshereka, kugira ngu Amureebe naahingura. Reero Yesu owa Nazareesi ku yaahikire aho, naaribata omu ruguuto rw'omu rurembo, yaayemerera ahansi y'omuti ogu yaabaire arimu gwonyini, yaareeba ahaiguru reero yaamweta omu iziina rye ati, "Zakaayo, temburuka. Ninja omuka naiwe kurya kyamushana." Kigumire munonga kushoboorora! Akaba atakareebaga ogwo mushaija, ebiro byona by'amagara Ge. Akaba atakamucwaga ryera.

55 Kikaba kigumire munonga kushoboorora, obu obundi nk'amagana n'amagana g'abantu, eego, shana nk'abantu rukumi na magana ataano, enkumi ibiri baruga omu rurembo rwa Yeriko, Nibamushungisa, kandi Nibamushekyera, obu Yaaruga omuri orwo rurembo eihangwe eryo, nari ako kasheeshe, naaba nimmanyisa; ku Yaabaire naaruga omuri orwo rurembo, obu abantu baabaire Nibamurekyera ebijuma bijunzire. Kandi nimbaasa kuhurira omunyamurwa naagira ati, "Yeiwe, bangambira ngu Ozoora abafu. Yeiwe, nabi 'We, Iwe orikweyeta nabi! Ba, twine eirimbo aharuguru hanu eri baijwiremu, abantu, abantu barungi, abanyamurwa nkaanye; inamuka aharuguru hanu, obazoore. Ka Tukureebe noozoora abafu." Tarahuriire n'obu kyakuba ekigambo kimwe eki baagambire, omwe naaregyeta ekintu kimwe, n'ondijo naagamba ekindi.

56 Kwonka enyima okwo aha rubaju rw'ekisiika, nka yaadi magana abiri na makumi ataano, hakaba hariyo omugurusu omusheegi enshoberwa owaabaire naatetema ahabw'embeho, n'emikono y'esati ye, yaagira ati, "Ai

Yesu, Omwana wa Daudi, ongirire embabazi," kandi Yaamwemereza ahonaaho. Haleluya! Yoshua ku yaagambire n'eiraka rihango, omwanya mukye okuruga aho, mahiro ezitarikuhika-ezitarikuhika ikumi okuruga aho honyini ahu Yaabaire ayemereire, akeemereza izooba, eizooba rimwe. Kwonka omusheegi enshoberwa akeemereza O-m-w-a-n-a wa Ruhanga, Tiyaabaasa kuteera orundi rutambo ahaw'okwikiriza kwe, okwikiriza nk'oku Yoshua yaabaire aine. Amiina. Ahabw'okuba, akamanya ngu, ku Araabe ari Omwana wa Daudi, Ni Mesia oyorekirwe, n'ahabw'ekyo akaba Naabaasa kumuhumuura. Ekigumire munonga kushoboorora! Oo, mugyenzi! Buzima, kikaba kigumire munonga kushoboorora. Eego, sebo.

57 Ruhanga, kikaba kigumire munonga kushoboorora, oku Ruhanga yaabaire naabaasa kuba omuntu, kufa. Ruhanga, Amagara, Amagara Agatahwaho, kubaasa kuba Ruhanga (amagara g'obutoosha) kufa, kujuna omuntu, kumugarura omu Magara Agatahwaho. Ekyo kikaba kigumire munonga kushoboorora, oku Ruhanga ogwo omukuru owaabaire aijwire akaabunga koona n'Obutahwaho bwona yaabaire naabaasa kushuma ahansi haza akaba omuntu, kugira ngu afe ajune aba- . . . Ebihangirwe Bye. Oku Ruhanga yaabaire kimwe aha bi Yaahangire, kujuna, 'habw'okuba Akahanga omubiri Gwe. Yehova Ishebona, weena, akatuura omuri Yesu Kristo Omwana We. Yesu akaba ari omubiri gwa Ruhanga. Ruhanga akajwekyerwa omu ihema, omubiri gwa Yesu Kristo, kandi n'oku Ogwo owaabaire aijwire akaabunga koona n'Obutahwaho bwona yaabaire Omuntu omwe. Amiina. Nooreeba eki ndikumanyisa? Aho, kandi ngu ekyo Ruhanga akaba naabaasa kukikora, okufa, kandi, oo, ekyo kikaba kigumire munonga kushoboorora, kyo kyonka, oku Yaabaire naabaasa Kwekora omu muringo ogwo kugira ngu afeere oruganda rwona rw'abantu.

58 Kwonka, oo, ka n'ekigumire munonga kushoboorora, Omuntu ku yaaherize kubambwa, kwitwa, eicumu rihango ry'Abarooma, eririkwingana nka inci mukaaga nari munaana obugazi, rikashatura omutima Gwe, reero Eshagama n'amaizi bikarugamu nibihimintika. Reero Baamwiha aha musharaba, afiire, Baamuzinga omu-omu mwenda, batyo baamuta omu kituuro. Akafa buzima okuhitsya obu omuserukare w'Omurooma yaagizire ngu afiire, buri omwe owaabaire ari aho akagira ngu Afiire, okwezi kwagira ngu Afiire, enyonyoozi zaagira ngu Afiire, eizooba ryagira ngu Afiire, ensi yaarabanamu, yaagamba ngu Afiire. Kwonka aha kiro kya kashatu, akabaasa kuzooka yaaba ohuriire ogundi murundi, okutagaruka kufa, yaaruga omu bafu. Ekyo kigumire munonga kushoboorora. Amiina. Akagira ati, "Nyine obushoborozi bw'okuhayo amagara Gangye; kandi n'obw'okugeegarurira." Ekyo n'ekigumire munonga kushoboorora kya Ruhanga ky'amazima, okuzooka Kwe nikwo kwabaire.

59 Kikaba kiri ekigumire munonga kushoboorora, kya Ruhanga, obu Yesu yaatoorana abajubi, abate- . . . omu mwanya gw'abanyamurwa abatendekirwe, kutwara obutumwa Bwe. Kikaba nikireebeka oti shana, ku Ariija, Aryahikira aha Bafarisayo bakuru n'Abasadukaayo, reero agire ati, "B'eishe-emwe, niimwe bantu omu busingye bwona abaareebereire eki kigombe ky'ediini kikaguma kishemeire. Hati Naija kubatwara. Baashwenkuriimwe nibaija kuberatista, ku baraabareebe beemi omu byanga by'omu Iguru," nari hoona ei bari. Ninkibanganisa. (Yesu akagira ati, "Muri aba shoimwe, sitaane.") "N'ahabw'ekyo mureebe ahansi, mugire muti, 'Mbweni, tukaashemererwa.' Bakaashemererwa kumanya eki. Hati Naija kutandikira ahu mukihikize."

Kikaba kigumire munonga kushoboorora, boona ku Yaabacwereire orubanja akabagambira ngu n'aba sitaane, reero akashuuma eifo aha Nyanja ya Galilaaya haza akatoorana abashohi babisi abaabaire batarikumanya nangwa n'okuhandiika amaziina gaabo, kandi Akabaha ebishumuruzo by'okutaaha omu Bukama bw'omu Iguru, omu mwanya gw'okubiha Kayaafa, omunyamurwa omukuru. Omuntu akaabaasize ata, aha diini, eyaagyelerizeho . . . eki baabaire nibateekateeka ngu bagyerizeho, omu migyenzu yaabo n'ebindi, kurinda ebintu bya Ruhanga. Kwonka ngugu hanu Yaija kandi yaatoorana ekindi kibiina, eifo okwo aha mugyera. Kunu abantu batendekirwe kandi beegyesiibwe, kandi barabire omuri zaaseminariyo n'amashomero n'ebindi byona, kwonka Yaizira kimwe aho ebyo tiyaabitaho omutima, kureka yaakwata omuntu mubisi omujubi yaamuha ebishumuruzo by'okutaaha omu Bukama. Amiina.

60 Ekireetaho ekigumire munonga kushoboorora n'obu omuntu arikwikiriza Ruhanga kandi akaikiriza eki Ekigambo Kye kirikugamba. Ekigambo kya Ruhanga kikagamba ensi yaabaho. Ekyo nikyo kintu eki orikuteekwa kwikiriza, ekiro eki, n'Ekigambo kya Ruhanga ekyaraganisiibwe.

Reeba ogwo mukazi mukye enshoberwa ayemereire aho aha iziba. Akagira ati, "Nitumanya ngu Mesia ku ariija, Aryatugambira ebintu ebi." Yesu akaba yaaheza kumugambira oburemeezi bwe. Yaagira ati, "Sebo, naayetegyereza ku Ori nabi. Nitumanya ngu Mesia ku ariija, Aryatugambira ebintu ebyo." Mureebe.

Ruhanga arikugamba na maraaya. Ruhanga aheeblee ekitiinisa! Ruhanga arikugamba n'omushambani, amiina, kandi arikushaba obuyambi, "Mpa eky'okunywa." Kiteekateekyeho. Reero kyo gamba ekigumire munonga kushoboorora!

Kandi ka n'ekigumire munonga kushoboorora oku egoy mbibo y'Amagara Agatahwaho, eyaatoorainwe ira emisingye y'ensi etakatairweho, yaabaire neebaasa kuba omu kintu nk'ekyo; ahabw'okwetenga kw'omubiri, oku ogwo mukazi okuzire mukye enshoberwa, obundi ou baanagire akakurira aha nguuto z'omu tauni, hare okwo omu mutima gwe akaba yaatooraniirwe Amagara Agatahwaho.

Omwana gw'entaama ku yaitsirwe omusingye gw'ensi gutakatairweho, okurugiirira ahari Baiburi, amaziina gaitu gakateebwa omuri ekyo Kitabo. Yesu akagira ati, "Tihariho orikubaasa kwija Ahariinye Tata yaaba

atamwiriize haihi, kandi boona abu Tata Yampaire baryaija." Janjaaza ogwo Mushana kwonka!

61 Reeba ogwo Mushana ku gwahikire ahari abo banyamurwa n'obwengye bwabo bwona. N'enki ekyabaireho? Bakagira bati, "Ni Belezebuli, omuraguzi, daimoni."

Yaagira ati, "Muri aba shoimwe, sitaane." Okwo niyo kyarugire.

Kwonka omukazi mukye ogu, w'emicwe mibi ku yaagambire na Ruhanga, beitu egyo mbibo eyaatoorainwe ira ekaabaasize eta kuba omu-omu muntu w'emicwe mibi nk'ogwo? N'ekigumire munonga kushoboorora. Kwonka yetegyereze ogwo Mushana ku gwagijwereire. Ekagira eti, "Sebo, naayetegyereza ku Ori nabi." Hati, nabi, n'ou Ekigambo kya Mukama kiizira, kiizira nabi, waareeba. Kandi ekyo nikyo kyabaire kiri ekibi ky'ogwo mukazi, kandi We nabi akaba aine Ekigambo. N'ahabw'ekyo yaagira ati, "Naayetegyereza ku Ori nabi. Hati nitumanya ngu Mesia ku ariija, Aryakora ebintu ebi."

Yaagarukamu ati, "Manya, Niinye orikugamba naiwe."

OW'eishe-emwe, ogwo mukazi akatsigaho baketi egyo, atyo yaagyenda. Obujurizi bwe bukajuna orurembo rwe, Sukaara. Hati ekyo kikaba kigumire munonga kushoboorora, obu Ruhanga, Yesu ku yaakozire ekyo. Eego, sebo.

62 Kikaba kigumire munonga kushoboorora, obu Ruhanga yaata Omwoyo We omu bapentekoote, abajubi abooro hamwe n'abantu abateegyesiibwe, omu mwanya gwa Kayaafa omunyamurwa omukuru. Kandi, oo, oku Yaareetsire Obutumwa Bwe! Kikaba kigumire munonga kushoboorora, obu Ruhanga yaatoorana omuhanda ogurikwetwa "obuhabe, obushazi," abantu bakagwererana, baagurukyeera batwaza batyo, kandi baatwaza omu buryo oburikushusha nk'obw'abagwire eiraro. Bakabeeta "abashazi." Kigumire munonga kushoboorora, oku Ruhanga yaabaire naabaasa kuraba ahari zaasinagogi rugaatwa z'amaani, enkiiko za Sanhedrin z'amaani hamwe n'abanyamurwa bakuru abeeegire munonga, haza akatoorana ekibiina ky'abajubi babisi, abateegire abaabaire batarikumanya ekirengire aha Kumwikiriza n'okwikiriza Ekigambo Kye, reero bakareeba ebirikukirugamu. Kandi kikashemeza Ruhanga kuraba aha kintu eki baabaire nibeeta ekirikukirayo kuba ekirikwera omu nsi, akaihayo ekibiina kya "kasasiro etaine mugasho," oku babaaire nibabeeta, omuhanda ogu baabaire nibaramizamu, ogurikwetwa "obuhabe," kutaho omuhanda gw'okujuna. Eego. Hati, ago n'amazima, torikubaasa kukihakanisa. Paulo akagira ati, "Omu muhanda ogu beeta 'obuhabe,' nigwo ndamizamu Ruhanga wangye, Ruhanga wa baatatenkuriitwe; omuhanda ogurikwetwa 'obuhabe.'" Eego.

63 Kikaba kigumire munonga kushoboorora, obu egyo Nyomyo y'Omuriro y'amaani eyaarugire omu Iguru, Maraika wa Mukama, Enyomyo y'Omuriro ekeebembera Abaisraeli omu ihamba. Ekyo kikaba kigumire munonga kushoboorora, ekyagambire na Musa okwo omu rushaka orurikwaka. Kandi kikaba kigumire munonga kushoboorora. Reero bwanyima y'emyaka magana munaana . . . kandi kurugiirira aha Byahandiikirwe, omuri Yohaana Orikwera 8:58, ku oraabe nooyenda kumanya ahu kiri. Waaba nooyenda kumanya ahu kyatandikiire, okubanza, n'omu kitabo ky'Okuruga 13:31. Kandi kikaba kigumire munonga kushoboorora, obu, ahanyima y'orwo rugbyendo rwona n'obwo bwire bwona, ngu hanu Yesu akagamba, ati, "Abrahamu atakazairwe, Nyowe NDIHO." MBAHO akaba ari omu rushaka orurikwaka. MBAHO niwe Ogwo owaagambire na Musa.

64 Kikaba kiri ekintu ky'omutaano, ngu ahanyima y'okufa Kwe, okuziikwa, n'okuzooka. Kandi Saulo, ogwo Muyudaaya mukye w'enyindo eshongoize, ogumire, kandi ow'ekiniga kibi, kandi nangwa bamwe ab'omu Kanisa akabaita; omu rugyendo rwe naashuma Damasiko, kukwata abo bantu. Kandi eifo okwo bakaba baineyo nabi orikwetwa Anania, kandi akaba ariyo naabaragurira, nabi wa Mukama, naabagambira Ekigambo kya Mukama, 'habw'okuba Mukama akamwizira. Kandi Omuriisa Anania ku yaabaire ari eifo okwo, naaragura, Saulo yaashuumayo kumukwata. Reero omu ihangwe, egyo Nyomyo y'Omuriro niyo emwe eyaashuumire ekeebembera Israeli, ekateera Saulo ahansi. Kandi abantu boona, abaabaire beemereire aho, tibarabaasize Kugireeba. Kwonka Ekaba neemurinkana munonga, ahari Paulo, okuhitsya obu Yaamuhumize. Amiina. Akahuma. Akagireeba buzima, kwonka abandi boona tibaabasa Kugireeba. Kigumire munonga kushoboorora. Mugyenzi! Oo!

65 Eki ekihurikizo ky'omuntu omwe kirikubaasa kumanya, nikibaasa kukimanyisa ondijo. Egyo niyo nshonga erikutuma abantu baashutama omu-omu ruteerano, bakareeba omurimo gwa Mukama, haza bakaimuka bakashohora, Bakakishekyerera; kwonka abandi bo Bakakiramatiiraho, n'omutima gwabo gwona. Kigumire munonga kushoboorora, oku Ruhanga arikubaasa kukora abantu, abaine omubiri ogurikushushana. Kigumire munonga kushoboorora, okureeba oku Ruhanga arikukikora, nangwa n'omu biro ebi. Paulo kikaba kimugumiire munonga kushoboorora.

Noomanya, Paulo tarareebire Yesu omu mubiri. Akaba naateekwa kwakiira okushuuuirirwa nka Petero. Petero taramanyire Yesu omu mubiri na kakye.

Akagira ati, "Abantu bagira ngu Nyowe Omwana w'omuntu mba oha?"

"Bamwe bagira, ahabw'enki, ngu Ori 'Musa,' kandi abandi bagira ngu Ori 'Eliya,' nari 'Yeremia.'"

Yaagira ati, "Ekyo tikyo Naabuuza. Imwe nimugamba ki?"

Petero yaagarukamu ati, "Ori Kristo, Omwana wa Ruhanga Ohuriire."

Yaagira ati, "Oine omugisha, Simooni, mwene Yona. Omubiri n'eshagama tibyo byakushuuruirira ekyo, kureka Tata ori omu Iguru niwe yaakishuuruura. Kandi aha rukiri oru, Ndyayombekaho Ekanisa Yangye, n'amarembo g'okuzimu Tigarigibaasa." Nikyo ekyo, ekigumire munonga kushoboorora. Obu Yaabaire ayemereire aho, kwonka Taramumanyire omu buryo bw'omubiri; kureka Akamumanya ahabw'emirimo Ye n'okushuuruirwa, Akamureeba naahikiiriza Ebyahandiikirwe nk'oku biri.

66 Ekyo nikyo kintu ekigumire munonga kushoboorora ekirikiwa omuntu omu nyikiriza y'emikoro eya ira efukire, kikamutaasya omuri Ruhanga ohuriire. Kigumire munonga kushoboorora, okureeba omuntu omwe ogwo naashoma Baiburi emwe egyo, kandi Akaghakanisa, kwonka ondiijo we Akagiikiriza kandi akaakiira ebirikuhamya byayo. Yee, n'ekigumire munonga kushoboorora, ku arikureeba Neekora aha muntu ondiijo, buzima ashemereire kumanya ngu ni Ruhanga omwe. Enyikiriza ye egwire, ku eraabe neehakanisa. Ruhanga ku araabe naahamya Ekigambo Kye, obwo enyikiriza yaawe egwire. Amiina. Tingyendereire kugamba kubi ntyo, kwonka ago n'Amazima, ekigumire munonga kushoboorora.

Ngambire, "Edakiika makumi ashatu," mbwenu zaahika buzima. Nkiine nk'empapura mukaaga z'ebihandiiko hanu. Ekigumire munonga kushoboorora, nimukiikirizamu? [Abateeraine baagarukamu batu, "Amiina." -Omur.] Amiina, ninkiikirizamu. Kandi naaza kuheza.

67 Ka ngire eki naabagambira. Muhurikize. Hanu enshumi nkye ehwiringire, eifo omu Mashuumma, ei ndikuruga, nkaba nyine ka aisi krimu, eizooba rimwe. Omugurusi munywani wangye omutunzi w'emibazi, omugurusi orikwera buzima ozairwe obwa kabiri, akaba ari omushaija muzima. Nkaba mazire obwire ntamureebire, kandi nkaba nindaba omuri orwo rurembo, reero naayemerera kumureeba. Reero naareeba eiziina rye ahaiguru aho, naateekateeka nti, "Mpaho, mbwenu, eby'obushuubuzi bye abitaire hanu, kandi amazireho emyaka mingi."

Nainamukayo, naataahamu, kandi akaba ari aho, ashutami aho, naaranzya ahansi amaisho agarabize ahaiguru ya gaarubindi ze nkye, noomanya, kandi amaisho agarabize ahaiguru ya gaarubindi ze nkye ezaabaire zikwatiire aha mishaaya ye. Reero yaagira ati, "Yeiwe, ogu ka n' Ow'eishe-emwe Branham!" Atyo yaimuka, yaija yambumbatira, reero yantereateerah. Yaagambira mutabani we, ati, "Irooko otureetere aisi krimu.." Tukaba twemereire aho. "Nooyenda ekikopo kya cai ya kaawa?"

Naamugarukamu nti, "Ngaaha, sebo. Nimbaasa kukugaaniirica oruhe ekirenga, ku baakumpa ekikopo kya cai ya kaawa." Naagira nti, "Neetuma naacamuka." Naagira nti, "Mumpe ka aisi krimu."

68 N'ahabw'ekyo, baatureetera aisi krimu. Kandi-kandi abaishiki bakaba bari enyima aho, omu duuka, n'ebindi, reero twashutama twagiraho okuteerana kukye turiryo nitunyuunya aisi krimu.

Yaagira ati, "Ow'eishe-emwe Branham, ni-niinyenda kugira eki naakugambira." Ati, "Nka-nkaba nk'otaafayo kugambira abandi bantu." Twatandika kugaanira ahari Mukama n'oburungi Bwe. Kandi ogwo mugurusi obwo ariyo naarira, amarira nigaragara aha matama ge, reero yaagira ati, "Ni-niinyenda kugira eki naakugambira." Yaagira ati, "Ni-nikibaasa kuba eky'omutaano a-ahariiwe," yaagira ati, "kwonka niinyikiriza ngu omuntu nkaiwe okaakyetegyereza."

Naamugarukamu nti, "Mpaho, kyo gumizamu, ow'eishe-emwe. Niki?"

Yaagira ati, "Kare omu bwire bw'eibura rya sente," yaagira ati, "mutabani wangye oine enju omu ishokye hariya akaba ari omutsigazi." Yaagumizamu naagira ati, "Tukaba turi hanu omu-omu by'obushuubuzi obu obwire obwo," yaagira ati, "kwonka abantu bakaba bari abooro kandi bataine ky'okurya. Kandi okutunga ekintu, kutunga omubazi nari ekintu kyona, kikaba kibeetaagisa kugyenda bakeemerera omu runyiriri."

Kandi baangi omuriimwe ekyo nimukijuka. Buzima, nimwijuka. Kwemerera omu runyiriri, kutunga orusa okuruga aha ishaza, kugira ngu otungye emibazi egi, nari kutunga eky'okurya.

Reero yaagira ati, "Nkaba nshutami hanu, ekiro kimwe, ninshoma Baiburi yangye, reero, reero," ati, "haagira omuntu owaija omu muryango. Reero mutabani wangye yaimuka, akaba ari muto, yaaza omumaisho." Kandi yaagira ati, "Naahurira yaagira ati, 'Ngaaha, titurikubaasa kukikora,'"

Kandi yaagira ati, "Naahurikiza ntaireho omutima. Naata Ekigambo kyangye ahansi reero naahurikiza ntaireho omutima. Bwanyima ogwo mushaija yaagira ati, 'Sebo,' yaagira ati, 'omukazi wangye ari haihi kugwa kihuimura.'" Kandi ku yaareebire, yaagira ngu akareeba ogwo mukazi ari haihi kuzaara omwereere; omukazi na iba bakaba bari bato. Reero ogwo mutsigazi yaamugambira, "Yaagira ati, 'Na-na-naayemerera omuri orwo runyiriri hariya,' ati, 'oo, orurikwinga n'oburaingwa bw'ekyombeko ky'omu rurembo.' Yaayongyera yaagira ati, 'Omukazi wangye takibaasa kugumizamu ayemereire hari na kakye.' Yaagira ati, 'Niinyebuuza . . . Ekihandiiko eki omushaho yaahandiikaho omubazi nkiine, naateekwa kutunga omubazi, ahonaaho.' Ati, 'Tokiinyijuriza, reero nkamutwara omuka, bwanyima nkaija nkeemerera omu runyiriri? Ni-ninza kumwhirayo o-oruparura orurikumwikiriza kuheebwa omubazi, ku ora . . .'

"Reero omutabani, omwojo yaagira ati, 'Sebo, ekyo nikhenda ebiragi hanu. Ti, titurikubaasa kukikora.'"

“Yaagira ati, 'Mbwenu, naaba ntarikukimanya.' Yaagira ati, 'Yebare, munonga, mutabani,' yaahinduka kugyenda.”

Reero yaagira, ahonaaho ku yaatandikire kugyenda, haagira omuntu owaamugambira, okwo-okwo omu mutima gwe, ati, “Yosefu na Mariamu, obwire bumwe, nabo, bakabangira.”

69 Reero yaagira ati, “Nkaimuka naagira nti, 'B'orekire, mutabani! Rindaho kakye!'” Yaagira ati, “Ogwo mutsigazi yaayemerera. Naagyenda naareeta ekyo kihandiiko eki omushaho yaahandiikaho omubazi, naaza enyima okwo kandi naakijuza; obwo we ategyereize, akwaitse omukono gw'omukazi we. Kandi akaba ahweiremu amaani munonga, akaba ayegamiire aha ibega rya iba.”

Reero yaagira ati, “Nkashohora aheeru aho, kandi na . . .” Yaagira ati, “Onsaasire ahabw'okukora eki, sebo.”

Yaagarukamu ati, “Ekyo tikiine nshonga.”

“Akaba ainikire omutwe gwe, reero yaafa kumukwatsa.” Kandi ku yaakiteire omu ngaro ze, yaagira ati, “Ow'eishe-emwe Branham, nkareeba Yesu.” Yaagira ati, “Nkakita omu ngaro Ze honyini.” Yaagira ati, “Ow'eishe-emwe Branham, Akaba ari aho, buzima nk'oku Ari omu kishushani.” Kandi yaagira ati, “Nka-nkaba ntarikubaasa kugamba. Reero ogwo mushaija yaahinduka yaagyenda yaaruga omu kyombeko.”

Yambuuza ati, “Ow'eishe-emwe Branham, ekyo nookiikiriza?”

Naamugarukamu nti, “Ninkiikiririza kimwe. Buzima.”

70 Martini Orikwera owa Tours, ku oraabe orashomire ahari Martini Orikwera, akaba ari omuserukare. Kandi akaba ari-akaba ari owe . . . akakuratira omwoga gwa ishe. Burijo akaba ayehuriram uokweta kwa Ruhanga. Kureka, ninEEKATEEKA ngu, abantu be bakaba batari banyadiini buzima. Kandi ekiro kimwe akaba naaruga . . .

Bukaba buri obwire bw'obufuki bwingi munonga, nikwo ebyafaayo birikugira. Kandi akaba ari . . . Aha irembo hakaba hariho omugurusi omusheeegi arambiire aho, kandi obufuki bukaba buri haihi kumwita; kandi abantu baangi, bakaabaire baagaburiire ogwo mugurus, nari kumuha ebijwaro. Akaba naataka, aimukize omukono gwe ahaiguru. Omugurusi oine obureju, w'omurofa arambiire aha irembo ry'orurembo orwo. Kandi akaba naagira ati, “Hagire omuntu, owaanyamba. O-obufuki bwaza kuunyita. Ekiro eki ninfa. Hagire omuntu owampa eky'okweshweka.”

71 Martini Orikwera akaba yaaherize kugaba ebi yaabaire aine, byona. Akaba, nk'omuserukare, akaba ajwaire omunagiro gwe. Yaayemerera aha rubaju rumwe, kureeba yaaba hatariho n'omwe owaakukikora. Abantu bakaba bajia bagyenda, kandi tihariho n'omwe owaamuyambire.

Reero yairira aha mwanya ogwo, yaareeba ogwo mugurus. Yaamugirira esaasi. Yaajuuramu omunagiro gwe, yaasyorayo rurara ye yaagusharamu kabiri. Ekiweka kyagwo yaakyeshweka aha mabega, ekindi kicweka yaakishweka ogwo mugurus, kugira ngu bukaasheesha akirih, yaagumizamu yaagyenda.

Abantu bakamushekyerera, baagira bati, “Mureebe omuserukare orikushetsya, ojwaire ekiweka ky'omunagiro.”

Ekyo kiro, ku yaabaire abyami omu kitabo, yaasisiimuka. Hariho omuntu owaabaire yaaheza kutaaha omuri ekyo kishengye. Yaareeba, omuri ekyo kishengye, hakaba heemereiremu Yesu ajwaire ekyo kicweka ky'ekijwaro ekikuzire eki yaabaire ashwekirwe. Ekyo nikyo yaamanyireho.

72 Martini Orikwera, akaba ari ogwo mushaija, owaabaire ari omwe ahari abo bashaija enyima okwo abaarwaniriire Okwikiriza, oku abarikwera baahairwe rimwe kikahwa. Akaba naikiririza omu by'amahano bya Ruhanga. Akaba naikiririza omu kugamba omu ndimi. Akaba naikiririza omu Ndagaano yoona ei entumwa zaahandiikire. Akaba naagiikirizamu kandi Akagirwanirira, obwire bwona obu yaamazire omu nsi, kandi Ruhanga akakora eby'amahano. Akamanya, ku yaareebire ogwo musheeegi omugurus ayefubikire ekiweka ky'omunagiro gwe, ngu Ekigambo kya Ruhanga kyahikirizibwa ekirikugira kiti, “Nk'oku mwabikoreire abato aba okukira abandi, abato Bangye aba, biri Niinye mwabikoreire.”

Noogira oti, “Ogwo mushaija tarakireebire.”

Niinyikiriza ngu akakireeba. Niinyikiriza ngu akakitunga. Niinyikiriza ngu kiriho. Niinyikiriza ngu ogwo akaba ari Yesu ou yaareebire. Kukaba kuri okushuururirwa kwa Ruhanga okworekirwe, ahabw'okuba akakora nk'oku yaagambire.

73 Gamba aha kigumire munonga kushobooroora, hariho ekirkwenda kubaho. “Obu abaafeereire omuri Kristo barizooka, reero naitwe abahuriire abariba bakirih turyahindurwa, omu kaanya kakye, nk'ak'okuhumbya eriisho, tutwarwe hamwe Kumubugana omu kaabunga.” Eego.

Oo, Ruhanga ka naahikiiriza Ekigambo Kye omu busingye obu bw'obwengye bw'abantu! Ka n'otahinduka, oku Abaire ari nyomwabazyo n'eriizooba nikwo ari, kandi nikwo ariguma ebiro byona! Na hati ka Naakibaasa kucaaka ebi omuntu arikuteekateeka omu mutima gwe! Na hati ka Naakibaasa kuhindura omuntu! Kandi na hati ka

Naakibaasa kuhikiiriza buri kigambo kyona eki Yaaraganiise omu biro ebi! Tahinduka, oku abaire ari nyomwabazyo n'eriizooba nikwo ari, kandi nikwo ariguma ebiro byona! Na hati ka Naakibaasa kworeka kandi akaikiriza ngu bateere ekishushani ky'egyo Nyomyo y'Omuriro eyaakuratiire Abaisraeli, Egyo emwe eyaabaire eri na Mukama Yesu, niyo Egyo emwe eyaabaire eri eifo okwo na Saulo omu muhanda, niyo Egyo emwe eyaataahiremu kandi ekacungura Petero ekamwiha omu kihome! Maraika ogwo wa Ruhanga ari hanu ekiro eki, kandi naakora ekintu ekyo kyonyini eki Yaakozire obu Yaabaire ari hanu omu nsi naayeyorekyera omu muntu. Ahabw'enki? Tahinduka, oku abaire ari nyomwabazyo n'eriizooba nikwo ari, kandi nikwo ariguma ebiro byona.

74 Nimwikiririza omu kigumire munonga kushoboorora? [Abateeraine baagira bati, "Amiina." -Omur.] Niinyikiriza ngu Ruhanga naayenda ngu abantu baikiririze omu kigumire munonga kushoboorora. Naarenzya munonga aha bwire bwangye. Niinyikiriza ngu hanu honyini hakaabaasa kubaho ekigumire munonga kushoboorora. Amiina. Niinyikiriza ngu Ruhanga naayenda kandi naayetenga kukwata abaana Be reero Ayeyorekye. Kuri Naabaasa kutunga omushaija nari omukazi, omwojo nari omwishiki, bakakwatsa ahansi ebiteekateeko byabo, reero bakaba embohe Ze kandi Bakamwikiriza.

Niwe Kigambo Kye. "Bwa mbere na mbere hakaba hariho Kigambo, Kigambo ogwo akaba atuura na Ruhanga, kandi Kigambo akaba ari Ruhanga. Kigambo yaaba omuntu yaatuura naitwe."

Kandi hati Ari omuriyi, amatsiko g'Ekitiinisa, ogwo otahinduka, oku abaire ari nyomwabazyo n'eriizooba nikwo ari, kandi nikwo ariguma ebiro byona. Akagira, omuri Yohaana Orikwera 14:12 ati, "Orikuunyikiriza, emirimo Ei nkora nawe aryagikora."

75 Akaraganisa, omuri Luka Orikwera, ngu, "nk'oku kyabaire kiri omu biro bya Sodoma," obu Ekanisa eyaatoorainwe, ekibiina kya Abrahamu, kiriheebwa akamanyiso akarikushushana n'aku Abrahamu yaahairwe, kandi n'ekibiina kya Looti kikaba nikiza kuheebwa akamanyiso akarikushushana n'aku Looti yaahairwe.

N'ekintu ky'omutaano munonga okureeba ngu tutungire abahunduuzi b'amaani aba boona, nka Luteeri na Wesili, kwonka titukatungagaho omushaija okwo oine eiziina eririkuhereeruka n'eniyuguta h-a-m, entumwa omu nsi. G-r-a-h-a-m, ezo n'eniyuguta mukaaga. A-b-r-a-h-a-m ni Abrahamu. Tutungire ba Moody, ba Sankey, Finney, na Knox, Kaluvini, kwonka titukatungaga ham n'omwe, "ishe w'amahanga." Hati tumwine. Ekyo kigumire munonga kushoboorora. Ekyo mubaire nimukimanya? [Abateeraine baagira bati, "Amiina." -Omur.] Kandi reeba, buzima nikyo ariyo naakora, naabeeta okuruga omuri Sodoma.

76 Kwonka, mwijukye, Abrahamu akaba aine entumwa eruguru okwo otumirwe aha kibiina kye, nawe. Amiina. Beitu Akakora akamanyiso ka muringo ki, obwo ateire eihema omugongo Gwe? Akagira ati, "Niinyija kukutaayaayira kurugiirira aha bunaku bw'okuraganisa Kwangye, kurugiirira aha bunaku bw'amagara." Kandi Yaabuuza ati, "Saara, omukazi waawe arahi?"

Yaagarukamu ati, "Ari omu ihema, enyima Yaawe." Kandi ku yaagambire ekyo, Saara yaashekyera aha mutima.

Yaagira ati, "Ahabw'enki Saara yaasheka, naagira ati, 'Ebintu ebi tibikaabaasika'?" Mwareeba?

Yesu akagira ati, "Nk'oku kyabaire omu biro bya Looti, nikwo kiriba Omwana w'omuntu ku ariija, emirimo ei Nkora!" Ekigambo kya Ruhanga nikihikiirira. "Ku muraagume Omuriinye, n'Ebigambo Byangye byaguma omuriimwe, mushabe kyona eki murikwenda, kiryabashuuruirwa." Ekigumire munonga kushoboorora, kureeba okuraganisa Ruhanga . . . okuraganisa kwa Ruhanga, okumazire emyaka enkumi ibiri kuhairwe, kwonka emitwarize y'ekanisa etwaire abantu hare munonga. Kwonka omuri ebyo byona, Ruhanga naashuumira kimwe aho abarura ekyo Kigambo omu kanisa Ye honyini ogundi murundi, buzimazima. N'ekigumire munonga kushoboorora. Nimumwikiriza? [Abateeraine baagira bati, "Amiina." -Omur.]

Ka tushabe.

77 Hanu ku haraabe hariho omuntu, ekiro eki, orikwenda kureeba ekigumire munonga kushoboorora nikikukorerwaho, kandi n'okuhindura omutima gwawe kuruga omu butaikiriza, okataaha omu kwikiririza omuri Ruhanga, noobaasa kwimutsya emikono yaawe, ogire oti, "Mukama, onyijukye, onyijukye." Ruhanga abahe omugisha. Oo, mureebe emikono!

Tataitwe ow'omu iguru, emikono ni mingi munonga, tinkaabaasa kugambira buri omwe nti, "Ruhanga akuhe omugisha," kwonka Iwe noobamanya boona. Hindura emiteekateekyere yaabo, Ai Mukama. Oo, ikiriza kibeho, ekigumire munonga kushoboorora. Batuura bari nk'abarikweziringa. Bashusha nk'abaikiriza, obundi. Obundi bamwe omuribo ni baamemba omu kanisa, kwonka nabwo tibakabuganaga obwo bwire obu baakomoororwa kyarimwe, bakaikiriza, kandi bakamanya ngu eki Ruhanga yaaraganiise, Ruhanga naabaasa kukikora. Beitu, nitwatura ngu turi oruzaaro rwa Abrahamu, owaataire amaisho aha bi Ruhanga yaaraganiise, atabanganisibwe okutaikiriza, kureka akaguma, yaahimbisa Ruhanga. Hati, Tata Ruhanga, Ninkushaba, omu Iziina rya Yesu, bagirire embabazi.

78 Ai Ruhanga, shuuma omuriitwe, ekiro eki, otugyendagyendemu kandi otworekye ku Okiri Ruhanga w'eb'yamahano. Kora ekigumire munonga kushoboorora, Mukama, kandi oyorekye ku Ekigambo Kyawe na hati

nikikibaasa kurahuka kucaaka ebi omuntu arikuteekateeka n'ebi amaririire omu mutima gwe kukora. Okiri Ogwo owaayorekirwe kuri, ou Abrahamu yaayetsire Elohimu, Mukama Ruhanga, Omuhangi, Ogwo orikumara byona, Ogwo orikubaho wenka. Ai Ruhanga, Okiri Ruhanga Otahwaho, tohinduka, oku obaire ori nyomwabazyo n'eriizooba nikwo ori, kandi nikwo origuma ebiro byona, kandi Eshagama y'Omwana Waawe eyerize Ekanisa Yaagishemeza. Ekyo, Ekigambo, oo, kuri Baakiikiriize batongyeireho enyikiriza y'ediini, Mukama!

Kwonka, hati, Akagira ati, "Niinye Muzaabibu, naimwe muri amataagi. Eitaagi ryana ebyana by'omuzaabibu; ahakuba amagara g'omuzaabibu, g'eitaagi, garuga omu muzaabibu." Ka Nitukusima ahabw'eki, Ai Mukama! Ka kihikiire kimwe!

79 Kandi omu biro ebi by'obutaikiriza n'okwikiririza omuri baadaimoni n'amarogo, hamwe-hamwe n'eniyikiriza za buri muringo, kwonka nabwo niiwe Ruhanga ogwo owaayemerereize Yoshua eizooba. Niiwe Ogwo owaabaire ori aha nkoni ei Musa yaabangire aha nyanja. Niiwe Ogwo owaabaire naabaasa kweta enda, emira, ebikyere, kyona eki kyabaire kiri, nookozesa akanwa ka Musa. Niiwe Ruhanga ogwo owaabaire naabaasa kuta enjura omu mwanya. Niiwe Ogwo orikwija kwiha omuriro omu mwanya okagunaga ahansi. Tohinduka, oku obaire ori nyomwabazyo n'eriizooba nikwo ori, kandi nikwo origuma ebiro byona.

Ai Mukama Ruhanga, tworekye ekitiinisa Kyawe, ekiro eki, omu kujuna n'okwijuzya buri muntu owaimutsya omukono gwe. Kikore, Mukama. Ninshaba ngu egi etaba endiijo shaara eyomire. Kutaba okundi kufa kwimutsya omukono gwaitu, ahabw'e-ekintu kikye ekyakikora. Kureka ka kibe nikiruga aha ntango y'emitima yaabo, kitume abantu baataka munonga bat, "Ai Mukama Ruhanga, mpangamu okwikiriza okurikubaasa Kukwikiriza kandi okurikubaasa kwakiira buri Kigambo kyona, kukagamba, amiina ahari buri kuraganisibwa." Kikore, Taata. Ekyo Naakikushaba hati, omu Iziina rya Yesu Kristo. Amiina.

80 Kare, ni shaaha ina. Abarikwenda kushabirwa tikirkubeetaagisa kuteera orunyiriri hanu. Nibabaasa kuruteera hariya. Nimukiikiriza? [Abateeraine baagira bat, "Amiina." -Omur.]

Ni bangahi abari hanu abarikwikiriza ngu Tahinduka, oku abaire ari nyomwabazyo n'eriizooba nikwo ari, kandi nikwo ariguma ebiro byona, abarikwikiriza ngu ogwo mukazi mukye owaakozire aha kijwaro Kye n'orukumu rwe obwire obwo, Yesu Akaba-Akaba ariho mu mubiri, ogwo mukazi akakora aha kijwaro Kye. Ekyo n'ekigumire munonga kushoboorora. Tarabaasize kumuhurira ku yaamukozireho, kwonka Akahinduka yaagira ati, "Owankoraho n'oha?" Kandi ogwo mukazi akaba atarikubaasa kweshereka. Reero Yesu yaamugambira oburemeezi bwe, bwanyima okwikiriza kwe kwamukiza.

Kandi Baiburi, ebiro ebi, omu kitabo ky'Abaheburaayo, neegira ngu, "N'Omunyamurwa Omukuru orikubaasa kusaasira hamwe naitwe omu bweremwa bwaitu." Abarware ni bangahi abarikwikiriza ekyo? Mwimutsye emikono yaanyu. Ni kirungi, mukiikirize, tureebe hati ekyo ku kiraabe kiri amazima.

81 Noobuuza oti, "Ow'eishe-emwe Branham, ekyo nikibaho kita?" N'okwikiriza Ekigambo kwonka oku Kihandiikirwe. Otatwara orugambo, eki omuntu ogu arikugamba ngu Kiri kiti, kandi n'omuntu ogu akagamba ngu Kiri kityo. Nookiikiriza kwonka oku Kihandiikirwe.

Ku Araabe naija kuteekwa kukucwera orubanja ayegamiire oku Kihandiikirwe, mbwenu ahabw'enki nootwara oku ondiijo muntu Arikukishoboorora, 'habw'okuba okwo nikwo orikwija kucwerwa orubanja. Ekyo kyonka, Egyo niyo ngyenderwaho Ye. Atwire Naareeberera Ekigambo Kye. Tiharimu kintu kyona ekishobire. Ekyo n'Ekigambo kyonyini buzima. Ekyo nikyo kiritucwera orubanja, n'Eki, n'Ekigambo kya Ruhanga.

"Kandi ku muraagume Omuriinye," okwo n'okwikiriza, "Ekigambo Kyangye kyaguma omuriimwe," 'habw'okuba Niwe Kigambo, "obwo mushabe kyona eki murikwenda."

82 Hati kora aha kijwaro Kye, ogire oti, "Mukama Yesu, niinyikiriza n'omutima gwangye gwona ngu tutwire omu biro by'aha muheru. Niinyikiriza ngu Ori Ruhanga ogwo owaakozire eby'amahano ebi byona ebi omuriisa waitu yaatworeka, ekiro eki, omu Kigambo. Niinyikiriza ngu Ori Omunyamurwa Omukuru. Mukama, nyikiriza nkore aha kijwaro Kyawe. Reero Ogambe noorabira omu w'eishe-emwe ogu, kandi-kandi naagira ngu Ogamba noomurabiram. Kandi, ekindi, tarikuuman, kwonka Iwe noomanya." Reero orebe ku Araabe atari Ruhanga ogwo w'eb'yamahano, kandi nihashuba habeho ekigumire munonga kushoboorora, ekintu ekitarikubaasa kucondoozibwa eki omuntu atarikubaasa kumanya n'okwetegyereza.

Nimukiikiriza? [Abateeraine baagira bat, "Amiina." -Omur.] Ku Araakikore, obwo nitumanya ngu n'ekigumire munonga kushoboorora. Ekyo kihikire? ["Amiina."] Naaba ninza kugiraho orunyiriri rw'ab'okushabirwa; naagiire hare munonga naakyehuza okuhitsya obu nki-nki-nkirugireho, mbwenu obwire buri nk'obwahwayo. Mwikirize. Ka tutandikire aha . . . tindikubaasa . . .

83 Nintekwa kubabaganisamu. Ka tutandikire aha rubaju oru hanu. Omuntu ori aha rubaju oru. Ni bangahi orubaju oru hanu abarikumanya ngu tindikubamanya n'obu kwakuba okukumanyaho ekintu kyona, imutsya emikono yaawe; kandi orwaire, noomanya ngu nooyenda kushaba Ruhanga? Ni kirungi.

Bamwe omuriimwe mwikirize, eki mukiikirize n'o-omutima gwanyu gwona. "Mukama Yesu, iwe otahinduka, oku obaire ori nyomwabazyo n'eriizooba nikwo ori, kandi nikwo origuma ebiro byona! Ka Nkukoreho, Mukama.

Okwikiriza kwangye nikwija ah'Ori eseeri okwo aha mukono gwa buryo gwa Ruhanga, oshutami omu Kitiinisa. Kandi Omwoyo Waawe Orikwera, owaabaire ari Omuriyiwe, ari hanu ekiro eki. Ka Nkoreho kwonka, Mukama, ahabw'okwikiriza." Reero oreebe na hati ku Araabe ari obukomooko bw'ebigumire munonga kushoboorora, orikutuma ebintu byabaho ebitarikumanya na kakye. Mwecureeze.

84 Hanu, nimureeba ogu hanu hanu? N'omukazi w'omwiguguju oshutami orubaju oru enyima hanu. Arwaire oburwaire bw'entsigo. Niho bacherize kumushemeza. Ogwo mukazi tindikumumanya.

Ndi musya ahariyiwe. Ekyo kihikire, mukazi 'we? Kwonka ekyo n'amazima, tikwo? Noikiriza ngu ogwo Ruhanga owaabaasize kugambira ogwo mukazi mukye owaakozire aha kijwaro Kye okwo, kandi n'aha rubaju ruri rw'enyanja, noikiriza ngu ogu niwe Ruhanga ogwo? Torikubaasa kunkoraho, aha mubiri, nookimanya. N'ahabw'ekyo naaza . . . Kandi tindikumumanya. N'ahabw'ekyo hariho Omunyamurwa Omukuru, ahabw'okuba Akagira ngu Niwe Munyamurwa Omukuru. Tikwo? Kandi nookiikiriza. Ku waaba ori aho nooshaba kugira ngu abe iwe, hariho ekyakubaho, reero ahonaaho naakigamba. Ekyo kihikire? Kare.

Okushemeza oku oku baakushemeize tikurareebekire nk'okwakozirwe kurungi munonga. Ekindi, torikukira, kandi ekyo kikwitsize obwoba. Kandi ekyo nikyo kigyendererwa ekikureetsire hanu ekiro eki. Mukama Yesu ku araakunshuururire eiziina ryawe, nk'oku Yaakozire ahari Simooni owaizire, okaanyikiriza ngu ndi nabi We, omuheereza We? Ekyo nookiikiriza? Muky. Pigrum. Ekyo kihikire. Hati ikiriza n'omutima gwawe gwona, taaha omu ka okire. Waaza kukira ahabw'okuba okwikiriza kwawe nikukukiza.

85 Nimwikiriza n'omutima gwanyu gwona? [Abateeraine baagira bat, "Amiina." - Omur.] Kandi shi ab'orubaju oru abari hanu, n'ahandi, hariho orikwikiriza?

Omushaija oshutami hanu aha muheru, arwaire amaisho. Tindikumanya yaaba naamanya . . . Eego, yandeeba hati. Naahurira Omwoyo amuriho. Eego, nimureeba ogwo Mushana oguri ahaiguru y'ogwo mushaija? Omw. Otis, eryo niryo iziina ryawe. Tinkakureebahoga na kakye, kwonka oyeraarikiriire ahabw'amaisho gaawe. Kristo yaakukiza, okwikiriza kwawe.

Hati mubuuze ogwo mushaija ku ndaabe ndamureebire, ndikumumanyaho ekintu kyona, nari omukazi ogu, nari ondiijo weena. Ekyo n'ekigumire munonga kushoboorora. Ekyo nimukiikiriza? [Abateeraine baagira bat, "Amiina." - Omur.] Tahinduka, oku abaire ari nyomwabazyo n'eriizooba nikwo ari. Akaraganisa ngu, "Emirimo Ei nkora, naimwe muryagikora." Okwo nikwo Yaayeyorekire ku ari Mesia. Ekyo kihikire? ["Amiina."] Mbwenu, Tahinduka, oku abaire ari nyomwabazyo n'eriizooba nikwo ari, kandi nikwo ariguma ebiro byona. Kandi nimumanya ngu tiinye. Tindi Mesia. Ndi omuntu, ow'eishe-emwe mugyenzi waanyu. Kureka n'Omwoyo Orikwera ori hanu, niwe Mesia. Ogwo niwe Mwebembezi. Niwe orikumanya. Abantu abo tindikubamanya; nibakimanya.

86 Hanu, niinyenda kubooreka. Ngugwo omukazi w'omwiguguju oshutami aharuguru hariya aha rubaju, aharuguru hariya, arwaire aha maraka. Noikiriza ngu Ruhanga naabaasa kungambira eiziina ryawe? Muky. Kelly. [Ow'eishe-emwekazi yaarira, "Ogwo niinye!" - Omur.] Ekyo kihikire. Ni kirungi.

Nimwikiriza n'omutima gwanyu gwona? [Abateeraine baagira bat, "Amiina." - Omur.]

Omw. Swanson enyima kuriya, oine oburwaire bw'okwekanga, noikiriza ngu Ruhanga naabaasa kukukiza? Ku oraakiikirize n'omutima gwawe gwona! Kare, noobaasa kukira. Ruhanga yaakukiza.

Nimukiikiriza? Abantu abo tindikubamanya. Mubabuuze ku ndaabe nimbamanya. N'ekigumire munonga kushoboorora.

87 Mube murekireho kakye. Omushana ogu guri hanu, Guri ahaiguru y'omukazi. Omukazi nimmumanya. Ashutami hanu hanu. Orekye kweraarikirira, Muky. Collins, rekyera aho kwemereza omutima ahabw'ekyo kintu, kikatuma waarwara. Byona nibiza kuba gye. Ruhanga naayebembera. Hati, ogwo mukazi nimmumanya. Nimmumanya. Naaruga omu mashuumga Indiana, nari Kentucky. Nimmumanya. Iba hariya, ni memba w'ekanisa yangye, n'omu-n'omudiikoni eifo okwo, omushaija murungi. Kwonka ogwo Mushana ngugwo aho. Timurikugureeba ahaiguru y'ogwo mukazi? Atwire ayeraarikiriire, arwaire, kandi ashobeirwe ahabw'ekintu eki atarikumanya yaaba akikora nari atakikora. Oijukye, reka kweraarikirira, ow'eishe-emwekazi, nikiza kutereera. Naakimanya. Naaza kwebembera ku Oraamurekye akakora.

Amiina! Tahinduka, oku abaire ari nyomwabazyo n'eriizooba nikwo ari, kandi nikwo ariguma ebiro byona, Agumire munonga kushoboorora! Nitusiima ahabw'ekyo. Nimukiikiriza? [Abateeraine baayesiima." - Omur.]

88 Kyo nimwemerere aha bigyere byanyu reero mukyakiire, kandi mugire muti, "Mukama Ruhanga, naija Ahariyiwe omu Iziina rya Yesu Kristo, korera omuriinye, reero ompe ekitiinisa n'emigisha Yaawe kandi n'amaani. Omu mutima gwangye ka hataahemu ekigumire munonga kushoboorora hati hati. Niinyikiriza. Niinyikiriza." N'omutima gwawe gwona, kiikirize.

Mwimutsye emikono yaanyu obwo murikweshongora eki kyeshongoro ekya ira, "Nimmukunda, Nimmukunda ahabw'okuba Akabanza kunkunda." Humya amaisho gaawe. Shweka ebiteekateeko byawe byona, haza oikirize Yesu Kristo ataahe omuriyiwe, kandi buri omwe omuriimwe naaza kukira kandi aijure Omwoyo

Orikwera.

89 Ekintu kimwe ekigumire munonga kushoboorora, ekiro eki, kikaahemba ogu, kishemereire kuhemba omuriro omu mwanya ogu. Yesu Kristo ari hanu. Ekyo n'oha orikubaasa kukishoboorora? Mubuuze abantu aba, mubahikyeho. Mwine amaziina gaabo n'ebindi, aha rutambi rw'amaraka oru. Mugyende, mubabuuze. Mwareeba, tihaine eki ndikubamanyaho. Nikikora ki? Ruhanga, omu busingye obu bw'obwengye bw'obuntu . . .

“Enjura erahi omu mwanya,” nikwo sayansa yaabuurize omu biro bya Noa, “erahи ahaiguru okwo?” Ruhanga akagiraganisa! Ekagwa.

Ebantu ebi nibibaasa kubaho bita? Tindikumanya. Ruhanga akakiraganisa! Tahinduka, oku abaire ari nyomwabazyo n'eriizooba nikwo ari, kandi nikwo ariguma ebiro byona. Haleluya! Hati Nimmukunda, Nimmukunda ahabw'okuba akabanza kunkunda, kandi ahumwire amaisho gangye agaabaire gahumire, kugira ngu mbaase kutaahamu mbone kureeba Okubaho Kwe kandi manye ngu Ari hanu. Amiina kandi amiina!

Ka twimutsye emikono yaitu kandi Tumuramye hati obwo turiyo nitukyeshongora. Ruhanga aheebwe ekitiinisa! Mukama Yesu Kristo asiimwe, ahabw'oburungi Bwe n'embabazi! Ruhanga abahe omugisha.



Obutumwa obu bukabuuirirwa
William Marrion Branham
 “... omu biro by'eiraka ...” Kush 10:7